

## APOKORÍPISI

### Xesosi Kristo Iuaka Oerekiniua Pirena

#### *Ia Aãtsopa Oerekaua Xesosi Kamakiti*

<sup>1</sup> Ia aãtsopa oerekari Teoso nakitiakori Xesosi Kristo paĩtiki kamaenetakiti. Teoso iokanitari initiri iaxitikiri Xoãomoni Xesosi Kristo kamaenetakiti oerekini ikapani.

<sup>2</sup> Ikinika Xoão atamatakiti, ikinika ikenakotakiti pakini isãpireta ia aãtsopaã. Ikara atoko isãpiretaua ate Teoso sãkire, Xesosi Kristo sãpiretakiti iuamoni. <sup>3</sup> Ia aãtsopa atatsopatakani Teoso takariko erekari ninoamoni. Teoso takariko erekari ia isãkire kenakotakanimoni, ia isãkire kĩpitakanimoni, kotxi ikinika Xoão iõkatsopatakiti okatapaniri apokini.

#### *Xoão Iõkatsopare*

<sup>4</sup> Nota Xoão. Niokanitari ia niõkatsopare Teoso mereẽkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hĩtemoni. Ikamaerekaxiniretai hĩte. Uatxa iua aua. Merepitipanika kitxakapirĩka iua aua. Iua ãtipirika auapikako. Setxi matamatakoni iaxitikini Teoso topãkiniãtaã apisatoõ auakani sikari erekari hĩtemoni. <sup>5</sup> Xesosi Kristo apaka sikari erekari hĩtemoni. Atão inakarinoka sãpiretakari itxaua iua. Iua merepitipanika õkitikaua ipĩkani sauaki. Apaka itixi auakani auĩteakori auĩte itxaua iua.

Iua ate tiretakari. Ipina ate ikapani amaerekani imaktxakini ikapani, ininiã isikakaua erekari akamini ikapani. <sup>6</sup> Itxĩkitakaua auĩtetxiakori aniniua. Itxĩkitakaua sasetotxiakori aniniua, kotxi asãkirauata Teosokata. Ininiã atxari Xesosi:

“Ātipirika peerekai pite. Ātipirika pitenokara kaposotireri. Ameẽ.”

<sup>7</sup> Hātamata, Xesosi napani. Iua inako katxiārikata. Iuasaaki ikinimane kākiti atamatariko. Aamina ĩpiriāmitakari nopini iua tokakitakani apaka atamatariko iua. Iuasaaki ikini uākati kākiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameẽ.

<sup>8</sup> Apiananiri txari:

—Iōkatxi merepitipanika auakari Aopa inakori atoko nitxaua. Iōkatxi imapotōkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni —itxa.

### *Xoão Atamatarí Aĩtari Iaxitikiri*

<sup>9</sup> Nota Xoão, hĩtari. Nikamari Xesosi Kristo nireẽkiti, ininiã himoianari nitxaua, kotxi ātipirika nimĩteenekari nisisiritiko, hĩte misiritiko himĩteenekini atoko. Ikara misirikaretxi apokapitika atemoni, kotxi aãũite Xesosi Kristo nakitiakori atxaua. Nota aua Patamosi inakori pokomiriĩti. Nitakaãka uai, kotxi Teoso sãkire nisãpireta apanakinimoni. Ikinipoko nimarotakiti Xesosi Kristo pirena nisãpiretini xika kākiti takano nota uai. <sup>10</sup> Kākiti Apiananiri xinikini õtisaaki, Erekarí Mata-matakoti sikaimaroretano nota. Iuasaaki nikenakotari sãkiretxi nitikinimoni. Sãkiretxi apiaenetakari, trõpeta atoko nikenakota. <sup>11</sup> Itxari:

—Kākiti apisapanika naua nota. Nota auapanika ikinipoko xipokaãka atoko. Piōkatsopata aãtsopaã pata-matakiti tĩkane. Eereka piokanatarí iua aãtsopa kākiti Teoso mereẽkinimoni setxĩ sitatxiti auakanimoni Ásia tixineẽ. Piokanatsopata Épeso sitatxiti auakanimoni, Esimina sitatxiti auakanimoni, Pékamo sitatxiti auakanimoni, Txiatxira sitatxiti auakanimoni, Satxima sitatxiti

auakanimoni, Piratéopia sitatxiti auakanimoni, Araotxiséia sitatxiti auakanimoni pakini —itxa notamoni.

<sup>12</sup> Ininiã eereka nikirioka notakata sãkirauatakarì natamatini ikapani. Nikiriokasaaki, natamatari setxi tirikapi topãkini oro kamakori. <sup>13</sup> Tirikapi topãkiniãtaã, natamatari kãkiti itari iaxitikiri, iuaritika ipinimoni itxaua. Iua mãka õtanori. Ikitiãpeka apoka. Ipakiomatare atoko oro kamakoro aua itorotamoni. <sup>14</sup> Iãko iteene kasarori mapoa atoko itxa. Xamina tirinakari atoko itxa oki. <sup>15</sup> Ikiti mẽkorika pirõsi xamina ãki imẽkorikini atoko. Isãkire ene ãparaã torõkani atoko. <sup>16</sup> Iuako ikikomoni imaĩkaro setxi iõriki. Inamaã iouata mitari pokika. Iua iouata ipi uanaro aua. Atokatxi iotximere atoko itxa itoõ.

<sup>17</sup> Natamatakasaakiri, nirika ikitimoni. Koriãkari atoko nitxa. Ininiã iuasaaki itakari iuako ikikomonikiri nota nopini. Itxano:

—Kona pipĩkarauatape, kotxi ikinipoko auini apisapanika nota aua. Ikinipoko xipokaãka atoko nota auapanika. <sup>18</sup> Nota auãkipika inakarino. Nota koriãkaripekano, iuaritika hãtamatano. Ætipirika auãki inakarino nota. Ameẽ. Kaposotiireno nota, kotxi nipaniãtari kãkiti ipinini. Niposotiire aua niokanatiniri kãkiti maerekati kamakani misiritikoãtaã. <sup>19</sup> Piõkatsopatari mitxi patamatakiti, uatxaika patamatakiti pakini. Apikomoni noerekakiti apaka piõkatsopata, kotxi noerekaiko katana itiximoni ikari. <sup>20</sup> Kiripa ninoa iõriki setxi pakini niuako nikipomoni auakani? Teoso nitiriakori itxauana. Ninoa anikari nota sãkire nisãkire auiãkanimoni ninoa setxi sitatxi auakanimoni. Kiripa ninoa setxi tirikapi topãkini oro kamakori? Nisãkire auiãkani ninoa setxi sitatxi auakani itxauana —itxa Xesosi Xoõomoni.

## 2

*Xesosi Iokanapirena Épeso Auakanimoni*

<sup>1</sup> Xesosi misãkiretari Xoão:

—Piokanatariko ia nisãkire Teoso nitirimoni, Teoso sãkire auiãkanikata auakarimoni Épeso sitatxitiã:

Ninoa setxi iõriki maĩkakarino nota. Nimaĩkari ninoa iõriki niuako nikikomoni. Ninoa setxi tirikapi topãkini oro kamakori sauaki tĩpokotakarino nota. Ia nota sãkire. <sup>2</sup> Nimarotari ikinika hĩkamakiti. Nimarotari itori parĩkatxi pamimari hĩkama. Parĩkatxi kamimari inakasaaki, kona hĩtakanapari. Maerekati kamakani apokasaaki hĩtemoni, kona hĩte apakapana. Apokapeka apanakini kãkiti hĩtemoni. Itxana: “Teoso iokanatakiniraua ate.” Txamari, kona atão ninoa sãkire. Nimarotari kona hĩte auiritana ninoa kaminiri maerekati. Hĩte atamakaerekatana. Eereka himarotari kona atão ninoa sãkire. <sup>3</sup> Himisiritaãka nisãkire hĩsãpiretini xika, iuaritika himĩteenekari ikinipoko nota ĩkapani. Kona hĩsãpaka hĩparĩkauatini nota ĩkapani.

<sup>4</sup> Ikara hĩkamakiti erekari, txamari hĩtakanapari hĩtiretinino. Merepanika hĩtiretano. <sup>5</sup> Hĩxinikariko merepitipanika hĩtiretinino. Uatxa poiãoka hĩtiretano. Iuaĩkana hĩkamariko merepitipanika hĩkamakiti atoko. Himatakanapakaniãari ikara himaerekani, patimari napokini hĩtemoni. Nimaktxakariko hĩtirikapite topãkini. Ininiã Teoso sãkire auiãkani !auaika ereẽ, himatakanapakaniãari ikara himaerekani. <sup>6</sup> Auapitika atão hĩkamakiti, kotxi hĩte omanatari Nikoraito inakoni kamakiti. Nota apaka omanatari ninoa kamakiti.

<sup>7</sup> Kakenakokii hĩte, ininiã hĩkenakotariko Erekari Matamatakoti sãkire Teoso sãkire auiãkanimoni. Maerekati makamakati nauiritako amãtiiri Teoso tixine apanĩkaki auakari itximini. Iua amãtiiri tximakari auapika atipirika Teosokata,

—itxa Xesosi Épeso auakanimoni.

*Xesosi Iokanapirena Esimina Auakanimoni*

<sup>8</sup> —Piokanatariko ia nisäkire Teoso nitirimoni, Teoso säkire auiañkanikata auakarimoni Esimina sitatxitiã:

Ikinipoko auini apisapanika nota aua. Ikinipoko xipokaãka atoko, nota auapanika. Nipïpe, iuaritika iuañkana nõkitikaua. Uatxa ! nipinaika. Ia nota säkire. <sup>9</sup> Nimarotari hâtatsiire. Nimarotari hïte minakati ! auari. Iuaritika ikinipoko erekari aua hïte-moni. Nimarotari apanakini misäkirepiretinii hïte. Ninoa txa: “Xoteoakorira ate.” Txama kona atão Xoteoni ! itxauana. Ninoa apotiitiniãtaãua Satanasi nakiti. <sup>10</sup> Kona hïpïkapiri himisiritiko ïkapani ïkari. Satanasi takari apanakini hïte kateia ãki ataerekatinii ïkapani. Himisiritaãkako tesi pakini õti. Atxïiti hïpina nisäkire hãuikini xika, iuaritika kona hïtakanapapiri nisäkire hãuikini, ininiãkara nisikai ãtião saporieãta. Iua saporieãta apakapakari auapika ãtipirika Teosokata.

<sup>11</sup> Kakenakokii hïte, ininiã hïkenakotariko Erekari Matamatakoti säkire Teoso säkire auiañkanimoni. Maerekati makamakati kona iuañkana ikoriãika, —itxa Xesosi Esimina auakanimoni.

*Xesosi Iokanapirena Pékamo Sitatxiti Auakanimoni*

<sup>12</sup> Eereka Xesosi iuañkana misäkiretari Xoão:

—Piokanatariko ia nisäkire Teoso nitirimoni, Teoso säkire auiañkanikata auakarimoni Pékamo sitatxitiã:

Notamoni auari oa iouata ipi uana auakito. Ia nota säkire. <sup>13</sup> Nimarotari ikinika hïkamakiti. Nimarotari hãuiniãtaã. Ereẽ Satanasi kãkiti auïte itxaua. Iuaritika hïte aukari nota säkire. Kona hïte takanapari nisäkire hãuikini. ãtxipa inakori auama hïte sauaki. Iua sãpiretapikari nisäkire kãkitimoni. Ikara xika okapeẽka ereẽ Satanasi auiniãtaã. Iuaritika kona hãsikano. ! Hïtakanapari nisäkire hãuikini.

<sup>14</sup> Txamari auapitika hīkerokakiti. Aua kākiti hīte sauaki Paraão inakori sākire auiaġkani. Kitx-akapirīka iua oerekari Paraki inakori kākiti Isaeo auakani imisirienetini. Iua Paraki xika ikamarina maerekati, kotxi inikarina xinitxi teoso kamakorimoni sikakori. Oerekana kākiti kaminiri maerekati iīto nireēkiti āti kākiti itokata. !Apakata kākiti auikiniri Paraão sākire. <sup>15</sup> Hīte sauaki aua kākiti Nikoraito inakoni sākire auiaġkani. Nota omanatari ninoa auiaġ-iti sākiretxiti. <sup>16</sup> Hītakanapariko ikinika himaerekani. Hīkanapiriāko notamoni. Ikara atoko himakamakaniā, patimari hītemoni napokini. Ininiā nineenamau-ata maerekati kamakanikata mitaro iouataā ninamaā auakaroā.

<sup>17</sup> Kakenakokii hīte, ininiā hīkenakotariko Erekarī Matamatakoti sākire Teoso sākire auiaġkanimoni. Maerekati makamakati nisikariko komiri iaxitikiri kipatakori. Apaka nisikariko kai kasarori maerekati makamakanimoni. Iua kai nopini iōkataāka kākiti uāka amaneri apanakini mimarotakinīti. Apakapakarinani imarotari iuāka amaneri,  
—itxa Xesosi Pékamo auakanimoni.

*Xesosi Iokanapirena Txiatxira Auakanimoni*

<sup>18</sup> Eereka Xesosi iuaġkana misākiretari Xoão:  
—Piokanatariko ia nisākire Teoso nitirimoni, Teoso sākire auiaġkanikata auakarimoni Txiatxira sitatxitiā:

Teoso ākirirano nota. Noki xamina tirinakari atoko itxa. Nikiti mēkorīka pirōsi atoko itxa. Ia nota sākire.

<sup>19</sup> Nimarotari ikinika hīkamakiti. Nimarotari hītiraōki. Nimarotari iteene hāuikari nisākire. Nimarotari iteene hīparīkauata nota ġkapani, apanakini ġkapani apaka. Hīparīka nota ġkapani pasāpaniri inakasaaki, iuaritika hīkamapanikari nota ġkapani. Uatxa apiaāpota hīparīka nota ġkapani.

<sup>20</sup> Itxama, nisāpiretaiko hīkerokakiti. Hīte auiritaro sito, Xesapeo inakoro, maerekati okamini hīte sauaki.

Oa txa: “Teoso sākire sǎpiretakarono nota.” Otxama, omisirienetana ninitiriakori. Oa xika, ninoa kamari maerekati iĭtona nireĕkiti apanakinikata isirĭkinina. Apaka ninoa nikari nipokori teoso kamakori sikakori. <sup>21</sup> Niĭtapari otakanapiniri omaerekani, txamari kona onirekari otakanapiniri omaerekani. <sup>22</sup> Ininiĭ nota kamariko oa amianatini. Oakata sirĭkakani matakana-pakaniĭro, iteene ninoa atatsiirauata. <sup>23</sup> Oa anaakori nokapitikako. Ikara atoko inakasaaki, ikinimane Teoso sākire auĭĭkani imarotariko nimarotari ikinika kĕkiti ĕkixinire, ikinika ixinikakiti pakini. Ininiĭ erekari nisikako erekari kamakanimoni. Apaka nimisiritari maerekati kamakani. Hĭkamakiti iaĕka niĭkitxitai hĭte.

<sup>24</sup> Uatxa nimisĕkiretai hĭte apanakini Txiatxira sitatxiti auakani. Hĭte auikari Teoso sākire. Hĭte lauikari Xesapeo sākire. Hĭte kona apaiaĕkari Satanasi oerekakiti, iua imarore. Kona ninirekari nisikinii apikomoni parĭkatxi nota ĭkapani, kotxi uatxa iteene hĭparĭkauata nota ĭkapani. <sup>25</sup> Ianoka ninireka hĭkamini. Hĭte auikari nisĕkire, ininiĭ hĕuikiniritika nisĕkire, nikanapiriĕko.

<sup>26</sup> Iua maerekati makamakati, ĕtipirika nipaniĕtakiti kamakari, iuamoni nisikariko niposotiire itixi auakani auĭte ininiua. <sup>27</sup> Teoso sākire kitxakapirĭkari txari:

Auĭtetxi itxauako. Itapararitika ipaniĕtana nino inireĕkiti ikaminina. Imakamakaniĕrina inireĕkiti, imisiritana ninoa, tiĭtxi kamakari tii imanirekakiniti ipakauanakini atoko.

Niri posotiire napakapakiti atoko iua apakapa. <sup>28</sup> Apaka nisikariko iĕriki ĭkanĕkapanikero iuamoni, ininiĭ notaka nisikaua iuamoni, kotxi iua iĕriki atoko nitxaua. <sup>29</sup> Kakenakokii hĭte, ininiĭ hĭkenakotariko Erekari Matamatakoti sākire Teoso sākire auĭĭkanimoni,

—itxa Xesosi Txiatxira auakanimoni.

## 3

*Xesosi Iokanapirena Satxi Auakanimoni*

<sup>1</sup> Iuaĩkana Xesosi misãkiretari Xoão:

—Piokanatariko ia nisãkire ninitirimoni, Teoso sãkire auiãkanikata auakarimoni, Satxi sitatxitiã:

Notamoni aua ninoa setxi Matamatakoni Teoso nakiti. Notamoni aua ninoa setxi iõriki. Ia nota sãkire. Nimarotari hĩparĩka. Apanakini sãpiretai hĩte auãki hinini hĩxinire, txamari Teosomoni koriãkanipekarai hĩte. <sup>2</sup> Himereka. Araõkire hĩtxapaniko. Hĩsikata-paratari erekari hãkixinireẽ auakari, kotxi iua erekari ipinaariãpota. Ininiã hĩtxĩkitakari iua erekari auãki inini iuaĩkana. Notamoni hĩparĩka Teoso apisatoõ na atão. <sup>3</sup> Hĩxinikariko hãpakapakiti, apaka hĩkenakotakiti. Hĩkĩpitariko hĩkenakotakiti. Hĩtakanapariko maerekati. Erekari hĩkamako, kotxi kiĩtiriri apokini atoko napokako uai. Kãkiti kona imarotari kiĩtiriri apokini manapi. Ikara atokokana nitxako nikanapiriãkasaaki.

<sup>4</sup> Hĩte Satxi sitatxiti auakani sauaki auapanika apanakini maerekati makamakani. Ninoa auikapitikari nisãkire. Ninoa kãkiti imãka matxikotakani atoko itxana. Ininiã notakata isanako. Imãkana kasarori. Ikara atoko nikaminana, kotxi ninoa kamari erekari nipaniãtakiti.

<sup>5</sup> Maerekati makamakani ieretakariko mãkatxi kasarori. Kona noakapaniriko iuãkana naãtsopateẽ. Kãkiti iuãkana ikara aãtsopaã auakani ãtipirika auapikako Teosokata. Ikara atoko ininiã, nisãpiretari iuãkana nirimoni, initiriakori iaxitikini pakinimoni. Nitxana: “Nota nakitiakori itxauana ninoa.”

<sup>6</sup> Kakenakokii hĩte, ininiã hĩkenakotariko Erekari Matamatakoti sãkire Teoso sãkire auiãkanimoni, —itxa Xesosi Satxi auakanimoni.

*Xesosi Iokanapirena Piratéopia Auakanimoni*

<sup>7</sup> Iuaĩkana Xesosi misãkiretari Xoão:

—Piokanatariko ia nisãkire Teoso nitirimoni, Teoso sãkire auiãkanikata auakarimoni Piratéopia sitatxitiã:

Nota maerekati makamakaturano. Atão inakarinani sãpiretakarikarano nota. Kaposotiireri auĩtetxi Tavii inakori atoko nitxa, kotxi nota matakakakiti, kona ãti totari. Nota totakiti kona ãti matakakari. <sup>8</sup> Nimarotari hĩte parĩka. Hãtamata. Hĩparĩka nota ĩkapani aapokotxi tore matakakakori atoko itxa. Kona ãti posotari iseretiniri. Ininiã kãkiti !iposotari iotokakinii hĩte nisãkire hĩsãpiretini. Ikara atoko nikaminii hĩte, kotxi kona kataparai hĩte. Ikara atoko nikaminii hĩte, kotxi hĩkĩpitari nisãkire. Kona hĩkipatari nisãkire apanakini apisatoõ. <sup>9</sup> Apanakini txari: “Atão Xoteoakori atxaua.” Txamari Satanasi nakitiakori itxauana. Paxirari nino sãkire. Nikamariko nino kapotoreẽkiniãua hĩte apisatoõ. Iuasaaki nino txako: “Atãopitikara Xesosi tiretapitikai.” <sup>10</sup> Hĩkĩpitapekari nisãkire. Kamonõkoniri inakasaaki, kona hĩtakanapari nisãkire, ininiãkara apia maerekati ikini itixiti apokasaaki, iuasaaki ninĩkataiko hĩte. Iua maerekati kona misiritai hĩte. Iua maerekati apokako itixi auakani atamakaerekatini ĩkapani.

<sup>11</sup> Erepaniko, patimapaniriko napokini ereẽ. Ātipirika hĩkamariko erekari. Hĩtakanapapikariko maerekati. Ininiã iuasaaki ãti kona posotari imaktxakiniri auĩtetxi saporietane hĩtemoni nisikakiti. !Imaktxakarina ikara hĩparĩka ĩki.

<sup>12</sup> Nikamariko maerekati makamakati itĩkare mina atoko inini niTeosone misãkiretiko aikoti ãki. Auapika Teoso misãkiretiko aikoti ãki, ininiã !itakanapari Teoso sãkire. Niõkatariko niTeosone uãka iua nopini. Apaka niõkatariko Teoso sitatxine uãka iua nopini. Ininiã apanakini imarotari Teoso nakitiakori ininiuana nino. Iua Teoso sitatxine Xerosareẽ amaneri iua tixine katxakakari. Iua maerekati makamakati nopini

niōkatariko apaka nota uāka amaneri.

<sup>13</sup> Kakenakokii hīte, ininiā hīkenakotariko Erekarī Matamatakoti sākire Teoso sākire auiākanimoni, —itxa Xesosi Piratéopia auakanimoni.

*Xesosi Iokanapirena Araotxiséia Auakanimoni*

<sup>14</sup> Iuaīkana Xesosi misākiretari Xoão:

—Piokanatariko ia nisākire Teoso nitirimoni, Teoso sākire auiākanikata auakarimoni Araotxiséia sitatxitiā:

Niuāka “Ameē.” Nota atāo sākiretxiti sāpiretakarikarano. Nikamari ikinika nisāpiretakiti. Merepanika nikamari ikinipoko. Ininiā ikinipoko auīte nitxaua nota. <sup>15</sup> Nimarotari ikinika hīparīka. Hītixari: “Nauikapitikari Xesosi sākire.” Txamari kona iteene hinirekari hīkaminiri nipaniātakiti. Apaka kona iteene hinirekari hītakanapiniri nisākire. Kona kapatakari atokoni hītixaua hīte. Kona katxīkareri atokoni hītixaua hīte. Poomari atoko hītixaua. Notamoni apiaerekata kapatakari atoko hininiua hīte. Iuasaaki iteene hinirekari hīparīkauatini nota īkapani. Iteene himanirekakaniāri hīparīkauatini nota īkapani, apiaerekata katxīkareri atoko hininiua hīte, nisākire ikinika hītakanapini. <sup>16</sup> Notamoni hīte āparaā poomari atoko hītixa. Ininiā kona āparaā kapatakaāri atoko !hītixa. Apaka kona āparaā katxīkareēri atoko ! hītixa. Ikara atoko inakasaaki !nirekai. Ininiā mapara nikanakai hīte. <sup>17</sup> Hīte txa: “Katxineirotea ate. Katiiua ate. Apikomoni anirekakiti !auari,” hītixa. Txama kona himarotari hākixinireē iteene himatinaniuatini. Hākixinireē minakati !auari. Hākixinireē mokiri atoko hītixaua. Kasarari atoko hītixaua hākixinireē. Ikara atoko hininiā, kona himarotari Teoso. <sup>18</sup> Nōtākikai hīte hiamotiniri notamoni auakari oro atoko inakari. Oa oro xamina oeretakito. Ikara atoko hīkaminiā, ikinika hinirekakiti auako hītemoni. Hiamotariko mākatxi kasarori notamonikiri hīeretakini īkapani, ininiā kona

hîpêtauata kasara hinini xika. Ikara atoko hîkaminiã, hâkixinire !auari maerekati. Hiamotariko apaka pinîtxi notamoni auakari hõki îkapani, ininiã atão hîposota hâtamarauatini.

<sup>19</sup> Nitiretakini nõtåkika, apaka noerekana. Ininiã ikinipoko atão hîkamako maerekati hîtakanapini îkapani. <sup>20</sup> Hâtamatako. Hâkixinire toreë nota auapeka. Nota haãpoko maparakiri akiritakari atoko. Hîkenakotiniãri nakiritinii, hõsereiniãri hâkixinire tore, niïroã hîtekata nikaikotini îkapani. Iusaaki ninipokota hîtekata. Hîte nipokota notakata.

<sup>21</sup> Nauiritari maerekati makamakati topãkini notakata auîtetxi topanere nopini. Iua auîtetxi topanere nota nakiti. Iua atokotxikana nota topãka nirikata auîtetxi topanere nopini iua nakiti nopini, kotxi maerekati makamakati nota apaka txaua.

<sup>22</sup> Kakenakokii hîte, ininiã hîkenakotariko Erekarî Matamatakoti sâkire Teoso sâkire auiãkanimoni, —itxa Xesosi Araotxiséia auakanimoni.

## 4

### *Iaxiti Auîtetxi Topanere*

<sup>1</sup> Eereka natamatari iaxiti tore. Itore imatakakaãka. Merepanika nikenakotari trõpeta atoko inakari. Kâkiti sâkire atoko itxa. Imisâkiretano:

—Uai pina notamoni. Noerekaiko katana auakari tîkane.

<sup>2</sup> Iusaakipeka Erekarî Matamatakoti anikano. Iusaaki natamatari auîtetxi topanere iaxiti. Topãkakari aua iua nopini. <sup>3</sup> Iuaã topãkakari kai peereri pomêkoriri atoko itxa. Iua kai satónia inakori atoko. Apaka âti kai sâtxio inakori atoko itxa iua topãkakari. Kisi âkitari iua auîtetxi topanere. Iua kisi kai esimeráota inakori atoko itxa.

<sup>4</sup> Iua ïtinikata aua vïtxi koatro pakini topaneretxi. Vïtxi koatro pakini totiakori topãka iua topaneretxi nopini. Ninoa mãka kasarori. Ikiina aua saporietà oro kamakori. <sup>5</sup> Auïtetxi topanereãtaã atamataãka ito mẽkokari. Iotxira, iokaamori aua iuaãtaã. Iteene poenexitiri. Iua auïtetxi topanere apisatoõ aua setxi tirikapi. Setxi Matamatakoni Teoso nakitiakori itxauana ninoa setxi tirikapi.

<sup>6</sup> Iua auïtetxi topanere apisatoõ ipoa ãtakaãri atoko itxa. Auïtetxi topanere ïtinikata aua koatro Teoso tixine auakani. Ninoa okïtxinoka xãpokaïtotakini. Auana okina ikini iïtoãna. Itorotaãna aua okina. Iporikiãna apaka aua okina. <sup>7</sup> Okïtxinoka xãpokaïtotakiti ãti, ãkiti atoko itxa. ãtipekana kema auïte atoko itxa. ãtipekana aua kiki toõ atoko. ãtipekana kokoi araãkari atoko itxa. <sup>8</sup> Ninoa ikininape aua imïkitana seisi pakini. Imïkitana nopini, ipatapi apaka okina aua. Kona itomatana. Ikini pokamarariti, ikini ïkanõkati itxana:

“Erekai. Erekai. Erekai. Teoso Apiananiri pitxaua. Kaposotiireri pitxaua. ãtipirika auakarii. Kitx-akapirïka auakarii. Uatxa auakarii. Katana apaka pite auapanika,”

itxana ãtipirika.

<sup>9</sup> Ninoa okïtxinoka xãpokaïtotakini xipoãtakasaaki, ixikaretarina Teoso paxitiko pirena. Ixikaretarina: “ïkinipoko ikamakiti ate ïkapani erekarinoka. Peerekari iua auïtetxi topanere topãkakari, ãtipirika auapika inakari.” Ninoa xikaretari ikara Teoso ïkapani. <sup>10</sup> Ninoa vïtxi koatro pakini totiakori xikarauatakasaaki, ikapotoreëkauana ixitimoni iua auïtetxi topanere nopini topãkakari apisatoõ. “Ateosone,” itxana iua ãtipirika auapika inakarimoni. Itakarina isaporietane Apiananiri apisatoõ, kotxi Teosonokara ikinimane auïte. Iuasaaki itxana:

<sup>11</sup> “Apiananiri, aTeosone pitxaua. Ere kai pite, ininiã apakatapitika apaxitinii. Apakatapitika ikini-mane sãpiretinii: ‘Peerekai.’ Apakatapitika pite apakapiniri ikini posotiiiretxi. Ikara atão, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,”

itxana ninoa vïtxi koatro pakini totiakori.

## 5

### *Aãtsopa Iapiriãkori Pirena*

<sup>1</sup> Iuasaaki natamatari aãtsopa iapirikakori iua auïtetxi topanere nopini topãkakari uakoã. Iuako ikikomonikiriã aua. Iua aãtsopa auari iõka ãkiriko, inopinimoni pakini. Iua aãtsopa aua setxi popitari kãkiti makatamëkakaniri ïkapani. <sup>2</sup> Iuasaaki natamatari ãti Teoso nitiri iaxitikiri. Kataparari iua. Itapasãkireritika itxa:

—Kiripa apakata imaktxakiniri ia popitari? Kiripa posotari ikatamëkiniri ia aãtsopa? —itxa.

<sup>3</sup> Itxama, kona auari iaxiti auakari, kona auari itixi auakari, apaka kona auari itixi patapi auakari, iua aãtsopa katamëkakari !auari. Ninoa !iposotari ikatamëkinirina iua aãtsopa. !Iposotarina atamatinirina iua aãtsopa ãki.

<sup>4</sup> Ininiã iteene nitxiapata, kotxi iua aãtsopa iapiriãkori katamëkakari !auari. Ere kari kamakari !apokaãka ikatamëkiniri ïkapani, atatsopatiniri ïkapani. <sup>5</sup> Iuasaaki ninoa totiakori ãti txari notamoni:

—Kona pitxiapatape. Patamata ikiraã. ãkiti atoko inakari iua. Xotaa apika mekaniriakori auïte iua. Tavii apika mekaniri iua. Oerekapekari Satanasi poiãori inini. Iua apiata. Ininiã iuanani posotari ikatamëkiniri iua aãtsopa iapiriãkori. Iuanani posotari imaktxakiniri ninoa setxi popitari —itxa iua toti.

<sup>6</sup> Iuasaaki natamatari soti auíte okakori atoko. Iua itima iua auítetxi topanere apisatoõ. Ninoa ipi ipi pakini okítxinoka xāpokaĩtotakini, ninoa totiakori pakini ākitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanatana ninoa ikini itixitimoni. <sup>7</sup> Iua soti auíte atoko inakari sari iua auítetxi topaneremoni. Imaĩkari aātsopa topaneretxi nopini topākakari uakoā auakari. Iuako ikikomonikiriā aua. <sup>8</sup> Imaĩkasaakiri, ninoa koatro okítxinoka xāpokaĩtotakini, ninoa vītxi koatro totiakori pakini patimari ipamakinina soti auíte apisatoõ. Ikinikana auari arpa inakori xikari ikaminina ĩkapani. Imakinikana auari kopitipaki oro kamakori. Naia kopitipaki xāpoka koria atoko inakari peeremariri. Ia kamariāro Teoso sākire auiākani sākire iuamoni.

*Amaneri Xikariti*

<sup>9</sup> Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aātsopa iapiriākori. Pitenani apakata pimakatxakiniri popitari, kotxi pitenanira erekari. Pite okaāka. Piarēkaā piamotaua ate Teoso ĩkapani. Piamotapekaua ikini uākati kākiti sauaki. Ikini āti uāka sākire sākiretakani sauaki piamotapekaua. Ikinika itixiti auakani sauaki piamotapekaua ate.

<sup>10</sup> Pite txĩkitakaua ate auítetxiakori aniniua, sasetotxiakori apaka aniniua, Teoso ĩkapani aparĩkauatini. Ininiā itixi auakani auíte atxauako ate.”

<sup>11</sup> Iuasaaki natamatari itomaneri Teoso nitiriakori. Nikenakotari ninoa sākire. Kaiāopokori ninoa. Seĩ mio, apikomoni seĩ mio, apikomoni seĩ mio itxaāpokatana. ! Apakata ninoa iaõtiko. Ninoa ākitari iua auítetxi topanere, okítxinoka xāpokaĩtotakini, totiakori pakini.

<sup>12</sup> Itapasākireritika ixikarauatana. Itxana:

“Soti auïte okaãka kãkiti ïkapani. Ininiã ãtipirika apakata iua apakapiniri posotiiretxi, ikinika erekari, imaroretxi, taparãtxi pakini. Apakata ikinimane paxitiniri iua. Apakata ikinimane sãpiretiniri iua ereka inini. Apakata ikinimane iuikiniri iua.”

Ikara atoko ninoa xikarauata.

<sup>13</sup> Ikara eereka nikenakotari ikinika iaxiti auakani, ikinika ïkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti ãki auakani pakini xikarauatini. Itxana:

“Ikinika erekari ãtipirika aua iua auïtetxi topanere topãkakarimoni, iua soti auïte pakinimoni. Ikinika ãtipirika paxitana. Ikinika ãtipirika txari: ‘Peerekana ninoa.’ Ikinika taparãtxi ãtipirika aua ninoamoni.”

<sup>14</sup> Ininiã ninoa koatro, okïtxinoka xãpokaïtotakini txana:

—Ameẽ.

Iuasaaki ninoa vïtxi koatro totiakori patimari pamakini.

—ATEosone pitxaua —itxana iua ãtipirika auakarimoni.

## 6

### *Soti Auïte Makatxakari Popitari*

<sup>1</sup> Natamatari soti auïte makatxakiniri ãti popitari. Ikara natamatakasaaki, nikenakotari okïtxinoka xãpokaïtotakiti sãkire. Isãkire ikarokirauatini atoko itxa.

—Uai pinako. Patamata —itxa.

<sup>2</sup> Iuasaaki natamatari kavaro kasarori. Kiki aua oporikiã. Iua tapotxi aua. Auïtetxi saporieëtane sikaãka iuamoni. Iua sari ikini itixitimoni kãkiti auïte ininiua ïkapani.

### *Ãti Popitari Makatxakiko*

<sup>3</sup> Eereka soti auïte makatxakari ãti popitari aãtsopaã, ininiã ipi auape. Iuusaaki nikenakotari ãtipekana, okïtxinoka xãpokaïtotakiti sãkire:

—Uai pinako. Patamata —itxa.

<sup>4</sup> Ikara eereka natamatari kavaro põkamarari. Kiki aua oporikiã. Iua kiki sikaãka posotiiretxi neenamatzxi ikamini ikini itixitiã, ininiã neenamatzxi mauakaniãtaã ! auari. Itxikitakari kãkiti okakakiniua. Isikaãka iouata mitapoari ineenamauatini ïkapani.

#### *Ãti Popitari Makatxakiko*

<sup>5</sup> Eereka soti auïte makatxakari ãti popitari, ininiã ipi ãti auape. Iuusaaki ãtipekana, okïtxinoka xãpokaïtotakiti txari:

—Uai pina. Patamata —itxa.

Ininiã iuusaaki natamatari kavaro pomamari. Kavaro nopini topãkakari aua minari iaõtiko iuakoã. <sup>6</sup> Eereka nikenakotari ãti sãkirauatini okïtxinoka xãpokaïtotakini sauaki. Itxa:

—Ipixini kiro triko ïki, ãti õti kãkiti parïka ïkitxikana. ãti, ipixini pakini kiro atarokiri atoko inakari ïki, ãti õti kãkiti parïka ïkitxikana. Iïtxiã ïki, ovaã ïki pakini poiãopanikako.

#### *Ãti Popitari Makatxakiko*

<sup>7</sup> Eereka soti auïte makatxakari ãti popitari, ininiã ipi ipi pakini auape. Iuusaaki nikenakotari imapotõkirekiri, okïtxinoka xãpokaïtotakiti sãkire. Itxari:

—Uai pina. Patamata —itxa.

<sup>8</sup> Iuusaaki natamatari kavaro posõtakari. Inopini topãkakari uãka “Ipïkitxi” inaãka. ãti iua tikini sa. Iua akiritaãka “Maerekani Misiritikoãtaã” inaãka. Isikaãkana posotiiretxi kaiãopokori itixi auakani okiniua ïkapani, ininiã koatro kãkiti auiniãtaã ãti okaãka. Ninoa okana

kãkiti neenamatiã, natxiã, amianariã, kaxipiri kaneenamariã pakini.

*Ãti Popitari Makatxakiko*

<sup>9</sup> Ininiã soti auĩte iuaĩkana makatxakari ãti popitari, ininiã ipi ipi ãti pakini auape. Iuasaaki natamatar Teosomoni sikakori takikoãtaã patapi kãkiti okakoni. Ninoa okaãka Teoso sãkire isãpiretinina xika. Kona itakanaparina isãpiretinina Teoso kamakiti ninoa ĩkapani, ininiã ikara xika okaãkana. <sup>10</sup> Itapasãkireritika akirikatarina Teoso. Itxana:

—Apiananiri, ãtipirika erekari kamakarii pite. Atãonoka pisãkire. Kirisaakipa pimisiritari itixi auakani? Kirisaakipa pixikatxitaua ate, kotxi ninoa okaua ate? —itxana.

<sup>11</sup> Ininiã mãkatxi kasarori sikaãka ninoamoni. Eereka isãpiretaãkana:

—Hiãtappariko apikomoni. Teoso nirekari apanakini hĩtariakori, iniritariakori okiko hĩte atoko iniko. Hĩtariakori okaãka atoko, Teoso xikatxitai hĩte. Hiãtappariko ikara õti —itxa.

*Ãti Popitari Makatxakiko*

<sup>12</sup> Eereka nitikari soti auĩte makatxakiniri ãti popitari, ininiã seisi pakini auape. Iuasaakipeka itixi iteene iakeẽkata. Atokatxi mamãka, sako mata pomamari potxi iãko kamakori atoko. Kasiri kamarãka arẽkatxi atoko. <sup>13</sup> Iõriki itori iaxiti auakaro irika ĩkorapokoritimoni. Amãtiiri ĩtima iokatxaãkiti atoko otxa. <sup>14</sup> Natamatar iaxiti aãtsopa iapirikiniua atoko. Ikinika ixirata mitari, ikinika ipokomiriĩ pakini makatxakaãka. ãtiãtaã itakaãka.

<sup>15</sup> Iuasaaki ĩkorapokoriti auĩtetxiakori, kãkiti kaposotirerini, katiirini, sotato auĩteakori, kãkiti katapararini, nitiritxi amotakoni, nitiritxi minakanuia pakini kipataua aarikoã, kai mitari sauaki ixirataã. <sup>16</sup> Iuasaaki itxana ixirata auĩtemoni apaka kai mitarimoni:

—Hírikako ate nopini. Híkipataua, kotxi topaneretxi nopini topākakari, soti auíte pakini nirekari imisiritiniua ate. <sup>17</sup> Soti auíte misirikare õti manapi apopeka. Kona kākiti míteenekari ikara misirikaretxi.

## 7

Sêto Koarêta Koatro Mio Teoso Nitiriakori Itixi Auakani

<sup>1</sup> Eereka natamatari Teoso nitiri iaxitikiri timini atokatxi pokîkinimoni, âti atokatxi ereêkokinimoni, âti atokatxi kimapore sanaremoni, âti atokatxi kimapore kikomoni. Ininiã ipi ipi pakinipe ninoa. Ninoa maîkari îtima ipi ipi pakini itixi auakari îtimati. Ininiã îtima kona inapaika itixiã. Kona kâuaãriã ! inapaika îtima. Kona aaminaã ! inapaika îtima. <sup>2</sup> Natapari âti Teoso nitiri iaxitikiri inaãpotini atokatxi pokîkinimoni. Teoso âtipirika auakari takaõtxikare aua iuamoni. Itaparasãkireritika akiritana ninoa ipi ipi pakini Teoso nitiriakori. Ninoa parîka itixi, potxoari uiniti pakini imisiritinina. <sup>3</sup> Iua Teoso takaõtxikare auakiti txari ninoamoni:

—Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaõtxikare initiriakori itixi auakani teêtaã.

<sup>4</sup> Eereka nimarotari Teoso takaõtxikare apakapakani. Itakaõtxikaãkana sêto koarêta koatro mio kākiti. Ikini uãka Isaeo tixinikini takaõtxikaãka.

<sup>5</sup> Tosi mio Xotaa apika mekani takaõtxikaãka.

Tosi mio Hopẽ apika mekani takaõtxikaãka.

Tosi mio Katxi apika mekani takaõtxikaãka.

<sup>6</sup> Tosi mio Asee apika mekani takaõtxikaãka.

Tosi mio Natarii apika mekani takaõtxikaãka.

Tosi mio Manasee apika mekani takaõtxikaãka.

<sup>7</sup> Tosi mio Simião apika mekani takaõtxikaãka.

Tosi mio Arevii apika mekani takaõtxikaãka.

Tosi mio Isakaa apika mekani takaõtxikaãka.

<sup>8</sup> Tosi mio Seporõ apika mekani takaõtxikaãka.

Tosi mio Xosee apika mekani takaõtxikaãka.

Tosi mio Pëxamiĩ apika mekani takaõtxikaãka.

*Itomaneri Kãkiti Teoso Apisatoõ*

<sup>9</sup> Ikara eereka natamatari itomaneri kãkiti apotiitakaniua. !Apakata kãkiti iaõtiniri ikinikana. Aua kãkiti ikini itixitikini, kãkiti ikini sereti. Aua ikini uãka sãkire sãkiretakani. Ikinikana ninoa timanãta Apiananiri apisatoõ, soti auĩte pakini apisatoõ. Ninoa mãka kasarori. Aãtape aua iuakoãna. <sup>10</sup> Itapasãkireritika itxana:

—ATEosone topãka auĩtetxi topanere nopini. Iuara, soti auĩte pakini makatxakapekari amaerekani.

<sup>11</sup> Iuasaaki ikinika Teoso nitiriakori iaxiti auakani tima. Ninoa ãkitana auĩtetxi topanere, totiakori, ninoa ipi ipi okĩtxinoka xãpokaĩtotakini pakini. Ikapotoreẽkauana itoõna xitimoni, auĩtetxi topanere apisatoõ. “ATEosone pite,” itxana Teosomoni. <sup>12</sup> Ixipoãtana Teosomoni:

—Ameẽ. Ætipirika ikinimane sãpiretai ereka pinini. Peerekai. Kimarorei. Erekari pikamakiti ate ìkapani. Ikinimane paxitai. Kaposotiirei. Pataparai. Ætipirika ikara atoko atxai. Ameẽ.

<sup>13</sup> Ininiã eereka ninoa totiakori ãti pimaãno nota:

—Kiripa ninoa kãkiti mãkatxi kasarori ieretakani? Namonipa inana ninoa? —itxa iua.

<sup>14</sup> Ininiã nota txari iua:

—Pitera imarotari.

Ininiã iua txano:

—Ninoa iteene misiritaãkapeka. Uatxa ixipope ninoa misiritiko. Soti auĩte makatxakapekari imaerekaniua. Ininiã imãkana soti auĩte arẽkaã arokakori atoko itxauana. Uatxa kasarori imãkana, kotxi itxiko !auari. Soti auĩte makatxakapekari kãkiti maerekani ipĩkasaaki, ininiã mãkatxi kasarori atoko itxa ninoa ãkixinire.

<sup>15</sup> —Ininiã ninoa aua Teoso topanere apisatoõ. Imisãkiretiko aikoti ãki iparíkauatana Teoso íkapani ikiniõtika pokamara, íkanõka pakini. Ininiã iua auítetxi topanere nopini topãkakari auapikako ninoa sauaki. <sup>16</sup> Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. <sup>17</sup> Kotxi soti auíte auítetxi topanereãtaã auakari nĩkatanako ninoa. Iua anikana ninoa sõtoãrimoni. Iuaã auakari sõtoãri iãtakani ãtipirika auapikako. Teoso makatxakariko ikinika iãtsaãna. !Itxiapataikana.

## 8

### *Imapotõkire Popitari Makatxakiko*

<sup>1</sup> Imapotõkire popitari imakatxakasaaki, ikinipoko tsoríkaxitita Teoso tixineẽ. Ikara atoko ipixini oara. <sup>2</sup> Eereka natamatana setxi Teoso nitiriakori, iua apisatoõ timakani. Isikaãkana setxi xikari kamiko trõpeta inakori.

<sup>3</sup> Eereka ãti Teoso nitiri apoka. Itima Teosomoni sikakori takikoãtaã. Kamariãro arikiko koanati oro kamakori iuamoni aua. Kamariãro ito sikaãka iuamoni, Teosomoni isikini íkapani, ikinika Teoso nakitiakori amanaãkiti sãkiretxitikata. Ininiã arikari iua kamariãro Teosomoni sikakori takikoãtaã nopini. Oro kamakori iua Teosomoni sikakori takikoãtaã auítetxi topanere apisatoõ. <sup>4</sup> Ininiã iuakoã kamariãro txiã, Teoso nakitiakori amanaãkiti sãkiretxitikata kanĩka Teoso apisatoõ. <sup>5</sup> Ininiã eereka iua Teoso nitiri kosekari okoana. Ixãpokakari xamininiki mẽkorĩkakariã, Teosomoni sikakori takikoãtaã nopini auakariã. Eereka okari itiximoni. Iuasaakipeka aua karokirauari, mẽkokari pakini. Apaka iuasaaki itixi iakeẽkata.

### *Koatro Trõpeta Pirena*

<sup>6</sup> Ininiã ninoa setxi Teoso nitiriakori setxi trõpetauakini iposope itrõpetane ixõkinina ïkapani.

<sup>7</sup> Ininiã ninoa Teoso nitiriakori ãti xikarauata itrõpetaneẽ. Iuasaaki katxïkareri kai soro atoko inakari, apaka xaminaminiki mẽkorïkakari arẽkatxiã koketakori okaãka itiximoni. Ikara xika apanakini aamina itixi auakari arika, ininiã ipi ãti pakini aamina auiniãtaã ãtika arikaãka. Ikinika katsotati arika apaka.

<sup>8</sup> Eereka ãti Teoso nitiri xikarauata itrõpetaneẽ. Ininiã ixirata auïte atoko inakari arikatxikata okaãka potxoari uinitimoni. Ininiã ipixini potxoari uiniti arẽkatxi itxapekaua. <sup>9</sup> Ininiã apanakini potxoari uiniti ãki auakani ipïpe, ininiã ipi ãti pakini potxoari uiniti auakani auiniãtaã ãtika ipïpe. Iuasaaki apanakini maporoni apaka xipokaãka, ininiã ipi ãti maporo auiniãtaã ãtoka xipokaãka.

<sup>10</sup> Eereka ãti Teoso nitiri xikarauata itrõpetaneẽ, ininiã ipi ãti pakini initiriakori xikarauatape. Iuasaaki iõriki mitari iaxitikero katxaãkata. Otirika tirikapi atoko. Oïrika ipixini uini nopini. Oïrika ipixini sõtoãri nopini apaka. <sup>11</sup> Iõriki uãka, “Kapixiro,” otxaua. Ininiã ipixini ãparaã kapixiã. Ipi ãti pakini sõtoãri auiniãtaã, ãtinoka sõtoãri kapixiã. Ito kãkiti iãtari iua ãparaã, eereka ikoriãna, kotxi kapixiãri ãparaã.

<sup>12</sup> Ininiã ãti Teoso nitiri xikarauata itrõpetaneẽ, ininiã ipi ipi pakini initiriakori xikarauatape. Iuasaaki atokatxi ponikare, kasiri, iõriki pakini kona iteene !iponikaika. Imamãkapeka. Ininiãkara pokamara ipi ipi pakini oara atokatxi !iponikaika. Iua atokotxikana ïkanõka ipi ipi pakini oara kasiri, iõriki pakini !iponikaika. <sup>13</sup> Ininiã eereka nitikarauatakasaaki, nikenakotari ãti Teoso nitiri sãkire. Iua araaãpota Teoso tixine. Itapasãkireritika itxari:

—Erepaniko. Erepaniko. Erepaniko itixi auakanii. Auapanika apikomoni ipi, āti pakini trōpetā Teoso nitiriakori xōkini ĩkapani.

## 9

### *Āti Trōpetā Xōkiko*

<sup>1</sup> Ininiā āti Teoso nitiri xikarauata itrōpetaneē. Iuasaaki nitikari āto iōriki iaxitikero katxakini itiximoni. Iōrikimoni osikaāka xavi aariko mamapotōkire irikoti tore ĩkapani. <sup>2</sup> Ininiā iōriki atoko inakari mataakari iua aariko. Eereka katxiāri kaiāopoko pokīka. Katxiāri tokori arikikosaaki atoko itxa. Eereka iaxiti, atokatxi pakini piāka itxiā xika. <sup>3</sup> Iposo atoko txītxiri atoko inakari pokīka itxiā. Posotiiretxi isiākana, ininiā kaxiapiro itixi auakari posotiire atoko aua txītxirimoni, kākiti ioākini ĩkapani. <sup>4</sup> Ipaniātaākana katsotati imokakanina, apaka takari, aamina pakini imokakanina. Ipaniātaākana imisiritinina Teoso takaōtxikare iteētaā mauakini. <sup>5</sup> Kona isikaākana posotiiretxi kākiti okinina ĩkapani. Sīko kasiritinanira ninoa paniātaāka imisiritinina ninoa. Imisiritarina kaxiapiro ioākini atoko. <sup>6</sup> Iuasaaki kākiti nirekariko ipinini. Itxama, kona iposotarina ikoriinina. Initarina ipīkitxi, txamari iuasaaki ipīkitxi mitekapeka.

<sup>7</sup> Iua txītxiri kavaro atoko itxana. Kavaro neenamatzī kamakani atoko itxana. Ikiiāna aua saporīēta atoko oro kamakori. Itoōna kākiti toō atoko itxana. <sup>8</sup> Ninoa iāko sito iāko atoko itxana. Itsiriīna ākiti tsiriī atoko itxana. <sup>9</sup> Itorota ipatinina koana metao kamakori atoko. Imīkitana ene kavaro itomaneri miteēkani ene atoko. Mitekaī ene atoko itxana. <sup>10</sup> Ninoa xipi kaxiapiro xipi atoko itxana. Oko aua ixipiāna. Ninoa posotari kamatsiitiniri kākiti sīko kasiriti. <sup>11</sup> Ninoa auīte aua. Iua Satanasi nitiri. Mītxi aariko mamapotōkire irikoti āki auakari iua. Xoteo sākireē iua uāka Apatō itxaua. Kreko sākireē iua uāka

Aporioõ itxaua. Popĩkari sãkireẽ “Ikinipoko Xipokakari,” itxaua.

<sup>12</sup> Āti misirikaretxi napapeka. Txama auapanikako apikomoni ipi misirikaretxi.

### *Āti Trõpeta Xõkiko*

<sup>13</sup> Āti Teoso nitiri xikarauata itrõpetaneẽ. Iusaaki seisi trõpeta xõkapeẽkaika. Teosomoni sikakori takikoãtaã oro kamakori aua ipi ipi pakini iko. Ikara Teoso apisatoõ. Nikenakotari iko takote auakari sãkirauatini. <sup>14</sup> Ininiã iua txari Teoso nitiri iua trõpetã xikarauatakari:

—Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

<sup>15</sup> Naia ipi, ipi pakini Teoso nitiriakori iposopekana ia anokanani, ia kasiriti, ia õti, ia oara manapi ĩkapani. Ininiã ninoa sikakaãka kaiãopokori kãkiti okinina ĩkapani. Ininiã ipi āti pakini kãkiti auiniãtaã auiritaãka ātika okinina.

<sup>16</sup> Āti sãpiretano ninoa sotatone kavaro nopini auakani tosõtosi mirão aua. Kaiãopokori.

<sup>17</sup> Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana põkamarari xamina tirinakari atoko itxa. Apanakini poporeri. Apanakini posõtakari ěxõpiri atoko. Ikiina ākiti kii atoko. Inamaãna ipokĩka xamina tirika, katxiãri, ěxõpiri pakini. <sup>18</sup> Ikara xamina tirinakari, ikara katxiãri, ikara ěxõpiri pakini inamaãna pokĩkakari, okari kaiãopokori kãkiti itixi auakani. Ininiã ipi āti pakini kãkiti auiniãtaã ninoa okari ātika. <sup>19</sup> Kavaro posotiire inamaã, ixipiã pakini aua. Ninoa xipi imini atoko itxa. Ixipiãna aua ito kiiri. Ninoa kii misiritari kãkiti.

<sup>20</sup> Ininiã itomane kãkiti koriã ia misirikari xika. Iuaritika kãkiti mokakoni maerekati kamakani !inirekari itakanapinirina imaerekani. Ninoa kapotoreẽkapanikaua

Satanasi nitiriakorimoni. Ikamapanikarina ninoa amanaãkiti. Iteosonetari aamina kamakori, oro kamakori, pirata kamakori, pirõsi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itĩpokotinina. <sup>21</sup> Ninoa kãkiti okapanikari apanakini. Ikamapanikarina miĩti parĩka. Isirĩkapanikana apanakinikata. Iĩtirĩkapanikarina apanakini kãkiti tii. Kona inirekarina maerekati itakanapinina.

## 10

### *Aãtsopa Axapitiri Iapirikakori*

<sup>1</sup> Iuusaaki natamatari Teoso nitiri iaxitikiri katxakini ĩkorapokoritimoni. Kataparari iua. Iua katxiãri iaxitikiri ãki. Katxiãri imãka atoko itxa. Kisi ikii nopini aua. Itoõ atokatxi atoko itxa. Itapike aãtsota tirinakari atoko itxa. <sup>2</sup> Imaĩkanãtari aãtsopa iapirikakori axapitiri. Iuakoã aãtsopa ikatamẽka. Itakari ikiti ikikomnikiri potxoari uiniti nopini. Isanaremonikiri ikiti itakari imiriĩ. <sup>3</sup> Akiripoakata ãkiti atoko. Iuusaaki setxi iokaamori kenakotaãka. <sup>4</sup> Iuusaaki niõkatsopaaritari ninoa setxi iokaamori sãkire. Txamari nikenakotari ãti iaxitikiri sãkire. Itxano:

—Kona piõkatsopatapiri ninoa setxi iokaamori sãkire — itxa iaxitikiri.

### *Aãtsopa Axapitiri Nikiko*

<sup>5</sup> Iuusaaki Teoso nitiri aua ãti ikiti imiriĩ. Potxoari uiniti nopini ãti ikiti aua. Iua õtanõkari iuako iaxiti. <sup>6</sup> Iuusaaki itxa:

—Uatxa nisãpiretakiti Teoso ãtipirika auakari sãkire. Ikamari ikinika iaxiti, iaxiti auakani pakini. Ikamari ikinika ĩkorapokoriti, ĩkorapokoriti auakani pakini. Ika-mari potxoari uiniti, ikinika iua ãki auakani pakini. Teoso misiritinina maerekati kamakani !okananiikari apokini.

<sup>7</sup> Apikomoni āti trōpeta xikarauatapanika. Iuasaaki kitx-akapirīka Teoso kipatakiti oerekaākako. Teoso sāpiretakiti iniritiakori ĩkorapokoritimoni, isākire sāpiretakanimoni paītiki oerekaākako —itxa Teoso nitiri.

<sup>8</sup> Eereka uuaīkana nikenakotari iaxitikiri sākirauatini:

—Pisa. Papariko aātsopa iapirikakori, Teoso nitiri uakoā auakari. Iua āti ikiti imiriī, āti ikiti potxoari uiniti pakini aua kititakari.

<sup>9</sup> Ininiā nisa iuamoni, ininiā nitxari iua:

—Pisikano ere aātsopa iapirikakari.

Iuasaaki itxano:

—Papakapariko, nika pitxari ia aātsopa. Pitikakoā kapixiriko ia pinikakiti, iuaritika pinamaā potxoariko. Mapa atoko itxako —itxano nota.

<sup>10</sup> Ininiā nimaīkari ĩkora aātsopa, nika nitxari. Ninamaā potxoari. Mapa atoko itxa. Txamari nitikakoā kapixiri iua aātsopa ninikakiti. <sup>11</sup> Iposo atoko isāpiretano:

—Iuaīkana pisāpiretariko apikomoni Teoso sākire, kaiāopokori kākitimoni, kaiāopokori āti uākamoni, kaiāopokori āti uāka sākire sākiretakanimoni, kaiāopokori auītetxiakorimoni pakini pisāpiretariko nisākire —itxano.

## 11

### *Ipi Teoso Sākire Sāpiretakani*

<sup>1</sup> Aāke niaōrauatini ĩkapani nisikaāka. Iuasaaki Teoso nitiri txano:

—Pisa. Piaōtariko Teoso misākiretiko aikoti. Piaōtariko Teosomoni sikakori takikoātaā. Piaōtana Teoso misākiretakani iuaā auakani. <sup>2</sup> Kona piaōtapiri Teoso misākiretiko aikoti pirikere, kotxi Xoteo minakaniua apotiitiniātaāua iuaā. Iuaā ninoa ĩkapani. Ninoa misiritariko Teoso sitatxine koarēta toisi kasiriti. Ikara Teoso sitatxine, Xerosareē inakori. <sup>3</sup> Nisikaposotiiretanako ipi kiki. Teoso

sākire sāpiretakani ninoa. Ninoa ieretakariko sako mata. (Sako mata kākiti ieretakasaaki oerekari imatinaniuatini.) Ininiā mio tosētosi sesēta ōti pakini ninoa sāpiretariko nisākire.

<sup>4</sup> Ninoa ipi oriva mina atoko itxana. Apaka ipi tirikapi topākini atoko itxana. Ikini itixiti auakani auīte apisatoō, Teoso apisatoō ninoa aua. <sup>5</sup> Kākiti nirekasaakiri imisiritinina ninoa, iusaaki xamina tirinakari pokīka inamaāna. Ininiā iusaaki imokaiakarini xipope. Kākiti nirekasaakiri imisiritinina, ikara atoko itxa okikona. <sup>6</sup> Teoso sākire isāpiretakasaakina, iposotarina iaxiti itotini. Ininiā iusaaki āparaā kona ikipaika īkorapokoriti. Ninoa posotari āparaā arēkatxi inīkitakini. Iposotarina itxīkitakiniri ikini sereti maerekati apokini īkorapokoriti auakanimoni. Inirekasaakina, ninoa posotari ikara ikinika ikaminina.

<sup>7</sup> Teoso sākire isāpiretinina xipoka atoko, monōkori aariko mamapotōkire irikoti āki potoriākari pokīka. Iusaaki iua kamari neenamatchi ninoa ipi Teoso sākire sāpiretakanikata. Eereka iua okapena ninoa. <sup>8</sup> Ininiā ninoa īto sirīkako kimaporiātaā, mitari sitatxitiā. Iua sitatxitiā Apiananiri tokakitaāka aamina ipiriāmitakari nopini. Iua sitatxi akiriuākataāka Sotoma, Exito pakini, kotxi Sotoma, Exito pakini atoko itxa Xerosareē. <sup>9</sup> Ininiā iuaā ikini kākiti, ikini inirimane, ikinimane āti uāka sākire sākiretakani, ikini āti uāka atamatanako ninoa īto kimaporiātaā. Iuaā ikaikotanako ipi ōti, āti ōti, ipixini ōti pakini. Kākiti kona auiritari ikatikona. <sup>10</sup> Ininiā ikini kākiti atamatariko ninoa koriākani īto. Ininiākara ikinimane enenīkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ikapani. Ninoa kamariko ikara atoko inakari, kotxi ninoamoni naia ipi Teoso sākire sāpiretakani misiritana ninoa. Ininiā ninoa enenīka, kotxi Teoso sākire sāpiretakani koriāpeka.

<sup>11</sup> Iuaritika ipi ōti, āti ōti, ipixini ōti pakini napaka

atoko, Teoso txĩkitakana ninoa iuaĩkana auãki ininina ìkapani. Òkitakauana. Iuasaaki kãkiti atamatana, ininiã ipĩkarauatana. <sup>12</sup> Ikara eereka ninoa ipi Teoso sãkire sãpiretakani kenakotari iaxitikiri sãkirauatini:

—Uaimoni hina.

Ininiã ninoa kanĩka katxiãriã Teoso tixinemoni. Ninoa mokaiakariakori itikana ninoa kanĩkaãpotini Teoso tix-inemoni. <sup>13</sup> Iuasaakipeka itixi iteene iakeẽkata. Ininiã iua sitatxitiã kaiãopokori aapokotxi irika. Tesi aapokotxi auiniãtaã ãtika irika. Iuasaaki setxi mio kãkiti ipina. Kãkiti auapanika inakani pĩkarauata. Iuasaaki itxana:

—Teoso iaxiti auakari apiatakari itxaua —itxana.

<sup>14</sup> Ìkora misirikaretxi xipopeka. Iuasaaki ipi misirikaretxi apiari napapeka. Iuaritika erepaniko, kotxi paĩtiki ãti misirikaretxi apiari apokapanikako.

### *Trõpeta Imapotõkirekiri Xõkiko*

<sup>15</sup> Iuasaaki Teoso nitiri mapotõkirekiri xikarauata itrõpetaneẽ. Itomane iaxiti auakani iteene akiritari:

—Ikini itixiti auakani auĩte itxapekuaa aãuĩte Teoso, Kristo pakini. ãtipirika iua ikinimane auĩte itxauako —itxana.

<sup>16</sup> Iuasaaki vĩtxi koatro totiakori Teoso topãkiniãtaã apisatoõ topãkakani pamaka Teoso apisatoõ. Itxana:

<sup>17</sup> “Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirĩka aua. Katana ãtipirika pauapika. Erekapitikai, kotxi kaposotiirei, ininiã ãtipirika ate auĩte pitxaua.

<sup>18</sup> Kãkiti ikini itixiti auakani omanãkarauata. Uatxa piteka omanãkarauatini manapi apope. Uatxa apokapeka ipĩkani misiritiko mereĩko õti. Pinitiriakori, pisãkire sãpiretakani, apaka pinakitiakori pite paxitakani pakini ìkitxitiko õti

apokapeka. Ikinimane kãkiti poiãorini, kãk-  
iti kaposotiirerini pakini apakapariko ikamak-  
itina ìki. Iuasaaki pixipokariko ìkorapokoriti  
xipokakani,” itxana.

<sup>19</sup> Eereka natamatari iuaã Teoso tixineẽ imisãkiretiko aikoti tore imataakaãka. Iua aiko ãki natamatari Teoso kaixane, iua apokiniãtaã. Iuasaaki natamatari ito mēkokari. Nikenakotari ito okaratxirari, ito iokaamori pakini. Itixi iakeẽkata. Ito ãparaã kai soro katxïkareri atoko katxaka.

## 12

### *Imini Mitapoari, Sito Pakini*

<sup>1</sup> Eereka nitaponeẽ nitikoka. “Kipa atxiïti?” nitxa nãk-  
ixinireẽ. “Natokopa itxa Teoso oerekiniri kãkiti?” Kotxi  
sito tokiã Teoso tixine. Atokatxi iotximere iakirokaro oa  
omãka atoko inakari. Kasiri aua okiti patapi. Okiiã aua  
auïtetxi saporietane, tosi iõriki kamakori. <sup>2</sup> Oa kamixiro.  
Oa akiripoakata oãtatsiirauatini xika, kotxi kaiamapeka  
amarini oãuãkitakini.

<sup>3</sup> Eereka iuaïkana nitikoka, kotxi imini mitapoari tokiã  
Teoso tixineẽ. Põkamarari. Iua setxi ikii aua. Aua tesi  
iko. Ikininape ikii aua auïtetxi saporietane. <sup>4</sup> Ixipiã  
ikosekari kaiãopokori iõriki iaxitikero, uai ixiti oka itxaro  
iõriki. Itima oa sito apisatoõ, kotxi païtiki amarini oãuãk-  
itaka. Inirekari iixirãkiniri amarini, amarini auakasaaki.  
<sup>5</sup> Eereka oa sito auãkitakari amarini, kiki. Oa sito ãkiri  
aneẽkasaaki ikini itixiti auakani auïte itxauako. Auïtetxi  
kataparari itxauako iua amarini. Auakasaaki, imini !  
ixirãkari amarini. Patimari maïkiko iua amarini. Teoso  
auinimoni anikaãka amarini. Iuaãtaã Teoso topãkanãta  
auïtetxi itopanere nopini. <sup>6</sup> Oa sito miteka ãparaã  
makipakaniãtaã. Teoso oerekatapekari iuaã okaikotini  
ïkapani. Iuaã oinïkataãkako mio tosẽtosi sesẽta õti. Ipi  
anokanani, ãti anokanani ipixini pakini itxa.

<sup>7</sup> Eereka aua neenamatzixi Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. <sup>8</sup> Teoso nitiriakori tapara apiata, ininiã imini initiriakorikata !auritaãkaika Teoso tixine ikaikotinina. <sup>9</sup> Iua imini mitapoari iokanataãka maparamoni. Iua imini kitxakapirĩkaripekara. Iua Txiapo inakori. Iua Satanasi inakori. Iua misirienetari kãkiti ikini itixiti auakani. Maparamoni iokanatikosaaki, iua, initiriakori pakini okaãkana uai ĩkorapokoritimoni.

<sup>10</sup> Eereka nikenakotari Teoso tixinekiri sãkire kata-parakieneri:

—Kãkiti maerekani makatzakiko apokapeka uatxa. Teoso makatzakari kãkiti maerekani. Uatxa Kristo posotire oerekaãka. Uatxa oerekari ikinimane auĩte ininiua. Teoso mereẽkiti ikinimane auĩte itxaua uatxa, kotxi aĩtariakori kamapiretakari iokanatapeẽkaika mapara. ! Ikaikotaika Teoso tixine. Mitxi ikamapiretari aĩtariakori Teoso apisatoõ. Pokamara, ĩkanõka ikamapiretana.

<sup>11</sup> Aĩtariakori iokanatapekari Satanasi isini. Ninoa posotari iokanatiniri Satanasi, kotxi Teoso Soti Auĩtene ipina ninoa ĩkapani. Iarẽka xiketa ninoa ĩkapani. Ninoa posotari Satanasi iokanatinina, kotxi ninoa sãpiretari atão inakari Teoso sãkire. Ninoa iposope okikona Teoso ĩkapani.

<sup>12</sup> Hĩte Teoso tixine auakani hĩpoxokoniuatoko. Txamari hĩte itixi auakani, potxoari uiniti auakani, erepaniko, kotxi Satanasi apopeka ereẽ hĩte sauaki. Iua iteene naiataua, kotxi imarotari paĩtiki Teoso !auritaikari iua maerekati apikomoni ikamini —itxa iua Teoso tixinekiri sãpirena.

<sup>13</sup> Uai itiximoni okikosaaki, imini mitapoari asikatikinitaro oa sito amarini auãkitakakaro okiniro ĩkapani. <sup>14</sup> Oa osikaãka ipi mĩkitatxi kokoi mitari mĩkita, oãraini ĩkapani. Oa araã ãparaã makipakanimoni. Teoso oerekinimoni

osa. Iuaã Teoso nĳkataro oa ipi anokanani, āti anokanani, ipixini pakini. Iuaã imini mitapoari !iposotari oamoni apokini. <sup>15</sup> Oa araākasaaki, imini mitapoari koporikaātari āparaã inamaākiri oa tikini. Uini atoko itxĳkitakari āparaã, oa sito axāpoātini ĳkapani. <sup>16</sup> Kipatxi !auiritari āparaã sini oamoni. Ixoreka. Ixorekasaaki, ikinika āparaã imini namaākiri kipatxi āki isa. <sup>17</sup> Ininiã imini iteene omanataro oa sito. Ininiã asikatikinitana apanakini oa anaakori inaiatinina ĳkapani. Kākiti Teoso paniātakiti kamakani oa anaakori itxauana. Kākiti Xesosi Kristo sākire auĳākani oa anaakori itxauana.

## 13

### *Monōkori Potxoari Uiniti Pokĳkaātakari*

<sup>1</sup> Ininiã nitaponeē nitima ikipatxite nopini. Iuaã nitikari monōkori potxoari uiniti pokĳkaātini, kanĳkiĳta itxa. Iuamoni auari iko tesi pakini. Apaka ikii setxi aua. Ikinika iko aua auĳtetxi saporĳētane. Ikini ikii aua uākatxi Teoso misākirepiretakari. <sup>2</sup> Iua monōkori nitikakiti ākiti kaiōkari atoko itxa iĳto. Ikiti oso kiti atoko itxa. Inama ākiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiã iua auĳtetxi itxaua. Imini auĳtetxi ininiua atoko itxa. Imini txĳkitakari iua potxoari uinitikiri sākire kaposotiire inini, isākire kākiti auikini ĳkapani. <sup>3</sup> Nota atamatari ikiiniri. Ikii āti ipĳpe ikaro mitari xĳka. Eereka ikaro tximōka. Iuaĳkana auāki itxa ikii ipinakari. Kākiti ikini itixitikini atamatakasaakiri, itsorikaātana. Ininiã auĳkarina isākire. Ikamarina iua nireēkiti. <sup>4</sup> Ikinimane auikari imini mitapoari sākire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sākire. Ninoa teosonetari iua apaka. Ninoa sākire:

—Āti kaposotiireri potxoari uiniti pokĳkaātakari atoko inakari !auari. Kākiti !iposotari inaiatiniri iua —itxana.

<sup>5</sup> Iua potxoari uinitikiri auiritaãka isãpiretiniri maerekati sãkiretxiti. Imisãkirepiretari Teoso. Auiritaãka auǐtetxi ininiua koarẽta toisi pakini kasiriti. <sup>6</sup> Iua misãkirepiretari Teoso. Imisãkirepiretari Teoso uãka. Imisãkirepiretari Teoso auiniãtaã. Imisãkirepiretari Teoso tixine auakani. <sup>7</sup> Iua auiritaãka inaiatiniri kãkiti Teoso nakitiakori. Apaka auiritaãka ninoa imaĩkini. Auiritaãka kãkiti ikini uãkati auǐte ininiua, ikini itixiti auakani auǐte ininiua, ikini kãkiti sãkire sãkiretakani auǐte ininiua. Ikinimane auǐtetari iua maerekati kamakari. <sup>8</sup> Ikini itixiti auakani, Teoso nakitiakori minakanuia, auikariko iua potxoari uiniti pokĩkaãtakari sãkire, kotxi iteasonetarina iua. Itixi kamiko apisapanika ninoa uãka ! iõkataãka Soti Auǐte okakori aãtsopateẽ. Iua aãtsopaã auauãkatakani auapikako Teosokata mapĩkaninoka ininina.

<sup>9</sup> Hĩte, ia atatsopatakani kakenakokii, ininiã hĩkenakotari nısãkire. <sup>10</sup> Teoso nirekiniãri kateia ãki pitakiko, ininiã erekapitikari kateia ãki pauini. Teoso nirekiniãri pokiko iouata mitariã, erekapitikari pokiko. Ininiã pokaãkako iouata mitariã. Ininiã hĩte Teoso nakiti inakanuia himĩteenekariko himisiritiko. Kona hĩtakanapapiri Teoso kimapore. Ætipirika hĩkamariko Teoso nirekakiti.

### *Monõkori Itixiãkiri*

<sup>11</sup> Eereka nota itikari ãti monõkori. Itixiã ipokĩka. Aua ipi iko. Soti auǐte ãkiri iko atoko itxa, iuaritika isãkirauata imini sãkire atokokana. <sup>12</sup> Potxoari uiniti pokĩkaãtakari nitiri itxaua iua itixiã pokĩkakari. Potxoari uinitikiri sika-posotiiiretari iua, ininiã isari ikini itixitimoni. Itxĩkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximõka. <sup>13</sup> Iua itixiã pokĩkakari kamari posotiiiretxi mitxi mimarotakoti. Ipaniãtari xamina tirinakari iaxiti auakari ĩkorapokoriti apokini ikinimane atamatiniri ĩkapani. <sup>14</sup> Iua potxoari

uinitikiri auiritari itixiäkiri kaminiri posotiiiretxi iua ïkapani. Posotiiiretxi xika itixiäkiri misirienetari ikinimane itixiã auakani. Itxikitakari kãkiti kaminiri potxoari uinitikiri ïto atoko inakari kai kamakori. Ikara atoko ipaxitarina potxoari uinitikiri, kotxi ikarotaãka iouata mitariã, iuaritika iuaïkana auapanika ikii. <sup>15</sup> Itixiã pokïkakari auiritaãka itxikitakiniri potxoari uiniti pokïkaãtakari atoko inakari kai kamakori kosekasinaniretiniua, ininiã iua kai kamakori posotari isãkirauatini kãkitikata. Ipaniãtari kãkiti okiko imanirekakanisaakiri iteasonetiniri iua. <sup>16</sup> Itixiã pokïkakari paniãtari ikinimane kãkiti apakapiniri Satanasi takaõtxikare iuakoãna ikikomoni, minakaniã iteëtaãna. Ipaniãtari ikinimane kãkiti auïtetxi inakaniua, auïtetxi minakaniua, katiini, matiini, nitiritxi, nitiritxi minakaniua pakini, apakapiniri Satanasi takaõtxikare. <sup>17</sup> Kãkiti iua takaõtxikari mauakiniti !auiritaãka iamotitinina. !Auiritaãkana ivëtxirauatinina. Iua takaõtxikari potxoari uinitikiri uãka. Iuãka mauakanisaaki, aua nómero iua nakiti.

<sup>18</sup> Kimarore hitxako, ikara himarotini ïkapani. Kimarore hininiã himarotari potxoari uinitikiri nomerone kiki uãka itxa. Nómero 666.

## 14

*Soti Auïte Sëto Koarëta Koatro Mio Kãkitikata*

<sup>1</sup> Eereka nionakaãta nitaponeë. Natamatari Soti Auïte. Ôtanoxiratarari nopini auanãta. Ixirata uãka Sião inaãka. Kãkiti sëto koarëta koatro mio pakini aua iuakata. Kaiãopokori kãkiti. Iteëtaãna Soti Auïte iri uãka iõkatsopatapeëkaika. <sup>2</sup> Eereka nikenakotari ninoa xikarauatini. Itorõkani ene atoko itxa, kotxi ama eneeneri. Ikarokirauatini ene atoko itxa ninoa xikare. Viorão ene atoko itxa iua xikari ene. <sup>3</sup> Ninoa kãkiti sëto koarëta koatro mio pakini tima auïtetxi topanere apisatoõ, okïtxinoka xãpokaïtotakini ipi ipi pakini apisatoõ. Totiakori

vĩtxi koatro pakini apisatoõ apaka itimana. Ninoa sêto koarêta koatro mio xikaretari xikari amaneri. Apanakini !imaĩkari iua xikari amaneri. Ninoa sêto koarêta koatro mio ïkorapokoriti Teoso amotakini, ninoanoka posotari ixikaretiniri iua amaneri xikariti. <sup>4</sup> Ninoa kiki !isiríkana sitokata. !Auiritarina iĩtona kaminiri maerekati. Soti Auĩte sinimoni ninoa apaka sa. ïkorapokoriti auakasaakina, Teoso amotana ninoa. Ninoa merepanika sikaãka Teosomoni, Teoso Soti Auĩtene pakinimoni. <sup>5</sup> !Ikamarina maxikatiĩka isãkirena. Atão inakaranoka isãpiretana. ! Ikerokarina isãkirena Teoso iauĩtena apisatoõ.

*Ipi Āti Pakini Teoso Nitiri Sãkire*

<sup>6</sup> Eereka nitikari Teoso nitiri araaãpotini iaxiti itanoxiti. Iua sãpiretari Teoso iokanapirena erekari kãkitimoni ikini itixiti auakanimoni. Iua iokanapirenatxi kona xipoka. Isãpiretari Teoso iokanapirena erekari ikini uãkatimoni. Āti uãka sãkire ipinimoni. Āti uãka sãkire ipinimoni. Itxaãpota, itixi auakani sãkire, iuaritika isãpiretari Teoso iokanapirena ikini uãkatimoni. <sup>7</sup> Itaparasãkireritika itxari:

—Hĩpĩkariko Teoso. Hĩsãpiretariko, iua Apiananiri ininiua. Apokapeka kãkiti maerekati kamakani misiritiko õti. Hĩteosonetariko Teoso, kotxi iua kamari iaxiti, ïkoraxiti, potxoari uiniti, sõtoãri pakini —itxa iua Teoso nitiri araãkari sãkire.

<sup>8</sup> Iua sãkirauataka atoko, āti Teoso nitiri txari:

—Papurónia sitatxiti xipokapeka. Iuaã auakani kaposotiirerini, iuaritika ixipokapena. Papurónia sitatxiti auakani paniãtari imakinika itixi auakani maerekati ikaminina, maerekati ïtotxi nireẽkiti. Ininiã ninoa kamari maerekati Papurónia auakani paniãtakiti.

<sup>9</sup> Ninoa Teoso nitiriakori ipi sãkirauataka atoko, āti Teoso nitiri txari itaparasãkireritika:

—Teoso misiritanako kãkiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako kãkiti Satanasi takaõtxikare iteẽtaãna takakani, iuakoõna takakani. <sup>10</sup> Kãkiti iua atoko inakani misiritaãkako, kotxi Teoso iteene omanãkarauata maerekati ninoa kamakiti xika. Teoso misiritanako ninoa, ininiã atatsiirauatana xamina tirinakariã. Ëxõpiri arikanako ninoa. Teoso nitiriakori erekarini, itixine auakani, Teoso Soti Auĩtene pakini itikariko ikara kãkiti misiritiko. <sup>11</sup> Iua xamina txĩkitakari kãkiti atatsiirauatini. Iua xamina tirinapikako. !Ixipoka. Itirinapika. Itxiãkapika. Ninoa misiritiko ! iotoka. Pokamara, ïkanõka auapika ninoa misiritiko. Kãkiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuãka iĩtoãna auaiĩtotakini misiritaãkako ikara atoko —itxa iua Teoso nitiri sãkire.

<sup>12</sup> Ininiã hĩte Teoso nakitiakori, hĩte ipaniãtakiti kĩpi-takani, hĩte Xesosi nireẽkiti ãtipirika kamakani, kata-paraxinire hĩtxako. Himĩteenekariko kãkiti misiritinii.

<sup>13</sup> Eereka nikenakotari Teoso tixine auakari sãkire. Itx-ano:

—Nisãpiretakiti piõkatsopata. Kãkiti ipĩkasaaki Api-ananiri ïkapani iparĩkauatakasaaki, Teoso sikari erekari iuamoni.

Iua Erekari Matamatakoti txari:

—Ia atão. Mitxi pasãpaniri Teoso parĩka ikaminina. Uatxa itomatana, kotxi Teoso imarotapekari erekari ikamakitina.

### *Takari Amiko Pirena*

<sup>14</sup> Eereka nitaponeẽ nionakaãta iaxiti. Iuasaaki nata-matari katxiãri kasarori iuaã. Aĩtari iaxitikiri atoko inakari topãka iua katxiãri nopini. Ikiĩã aua auĩtetxi saporietane oro kamakori. Iuakoã saasara ãtoião aua. Pauanaro. <sup>15</sup> Iposo atoko ãti Teoso nitiri pokĩka Teoso

aapoko. Iua itaparasãkireritika akiritari iua katxiãri nopini topãkakari:

—Pikosekariko pisaasarate. Pamariko takari, kotxi takari amiko manapipekara. Takari ikini itixitikiri amiko manapipekara.

<sup>16</sup> Ininiã iua katxiãri nopini topãkakari isaasarateẽ isauakari ikini itixiti nopini auakari. Amari takari imakinika.

<sup>17</sup> Iposo atoko nitikari ãti Teoso nitiri pokïka Teoso aapoko Teoso tixineẽ. Iuamoni apaka aua saasara ãtoião iuakoã. Pauanaro.

<sup>18</sup> Iuaïkana ãti Teoso nitiri apoka. Teosomoni sikakori takikoãtaã ipotorika iua. Inïkatari xamina tirinakari iuaã. Iua itaparasãkireritika akiritari Teoso nitiri saasara auakiti:

—Pimaïkaroko pisaasarate. Pimakatxakaroko ova ikini itixitikero, kotxi ova oionapeka —itxa.

<sup>19</sup> Ininiã Teoso nitiri isaasarateẽ isauakaro ova ikini itixitikero. Itsotakitataro ovatsa. Iposo atoko okaro ova ori ova iopetiko mitari ãki. Okatsonakaãka. Teoso omanãkare iua ova iopetiko atoko itxa, kotxi Teoso iteene omanãkarauata kãkiti maerekani xika. <sup>20</sup> Ova ori kãkiti ki-tiã iopetikoãtaã sitatxi mapotökire. Txamari na ovapeñi ikara atoko itxa. Arëkatxiãra ikara atoko itxa. Iua arëkatxi uini panaã atoko itxa. Tresëtosi kirómetro arëkatxi aua. Arëkatxi ïpanaã kavaro namaãpeka apoka arëkatxi. ãti metro ipixini ïpanaã arëkatxi.

## 15

### *Teoso Misirikare Mïkani Setxi*

<sup>1</sup> Eereka nitaponeẽ nitikoka iuaïkana.

—Kipa atxiïti? —nitxa iuaïkana nãkixinireẽ, kotxi natamari Teoso nitiriakori setxi itixineẽ.

Ninoa minari misirikaretxi setxi pakini kãkitimoni. Apikomoni misirikaretxi !auaika. Ia misirikaretxi setxi inokasaakiri kãkiti, Teoso misiritana ninoa imaerekanina xika.

<sup>2</sup> Eereka natamatari ipoa atoko inakari. Ātakaãri, xamina tirinakarikata koketakori atoko itxa ipoa. Kãkiti tima ipoa itinikata. Ninoa iokanatapekari Satanasi sini, kotxi !ikamarina iua potxoari uunitikiri paniãtakiti. Iua potxoari uunitikiri atoko inakari kai kamakori paniãtakiti ! ikamana. !Apakaparina Satanasi takaõtxikare, iuãka nomerone. Ikininape aua viorão atoko inakari Teoso sikakiti. <sup>3</sup> Ninoa xikaretari Moisesi xikare, Teoso nitiri uai itixi auakari xikare. Ixikarenãtari Teoso Soti Auítene xikare. Ia ixikaretana. Itxana:

“Teoso Apiananiri, ikini posotiiretxi auakitii pite. Peerekari piparika. Pite kaposotiireri. Pite atãonani pikamakiti. Ikini uãkati auíte pitxaua pite.

<sup>4</sup> Ikinimane paxitaiko pite ipikareritika, kotxi pite Apiananiri pitxaua. Ikinimane txaiko pite: ‘Peerekai,’ itxaina. Kotxi pitenoka ! auari maerekati. Kãkiti ikini uãkati apokako pite-moni. Ninoa txaiko: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

<sup>5</sup> Eereka natamatari Teoso aapoko ãki. Natamatari iua auiniãtaã. <sup>6</sup> Iposo atoko ninoa Teoso nitiriakori setxi, misirikaretxi setxi mïkani, pokika Teoso aapoko. Ninoa mãka katsopiri, pomëkoriri. Ninoamoni aua oro kamakori. Itinimaï nopini inapa. <sup>7</sup> Ninoa ipi ipi pakini okïtxinoka xãpokaïtotakini iuaã aua. Okïtxinoka xãpokaïtotakiti sikari iãtatxi setxi pakini oro kamakori ninoa setxi Teoso nitiriakorimoni. Teoso auapininiika inakari xãpokakapekari iua setxi pakini iãtatxi omanãkareẽ.

<sup>8</sup>Teoso iotximere xāpoka iua aapoko āki. Katxiāri kasarori atoko itxa. Iuasaaki kākiti lauiritaāka Teoso aapoko ĩroini, ninoa Teoso nitiriakori, misirikaretxi mīkani setxi pakini, misiritakasaakina kākiti.

## 16

### *Iātatxi Teoso Omanākare Auakiti*

<sup>1</sup>Eereka nikenakotari Teoso aapoko āki auakari sākire. Itaparakieneritika imisākiretana ninoa Teoso nitiriakori setxi. Itxana:

—Hisa. Hīkitakari Teoso omanākare iātatxi āki auakari itixi auakanimoni —itxa.

<sup>2</sup>Ininiā ninoa Teoso nitiriakori sari. Merepanika ātika initiri kitakari iātatxi ākikiri itixi auakanimoni. Iuasaaki kimiti mitari, katsiiri, apoka kākiti Satanasi takaōtxikare auakini ĩtomoni. Potxoari uunitikiri atoko inakari kai kamakori teosonetakani ĩtomoni apoka ikara atoko inakari amianari.

### *Āti Iātatxi*

<sup>3</sup>Iposo atoko ātipekana Teoso nitiri kitakari iātatxi ākikiri potxoari uunitimoni. Iuasaaki āparaā arēkatxi itxapekaua. Kākiti ipīkari arēka atoko itxa iuasaaki. Ininiā ikinipoko potxoari uuniti auakani iuasaaki xipoka.

### *Āti Iātatxi*

<sup>4</sup>Iposo atoko ātipekana Teoso nitiri kitakari iātatxi ākikiri uinimoni, sōtoāri pakinimoni. Iuasaaki āparaā arēkatxinoka itxapekaua. <sup>5</sup>Iuasaaki nikenakotari Teoso nitiri āparaā nīkatakari sākire. Itxari Teosomoni:

—Pite maerekati makamakatii. Ātipirika auakarii pite. Atāo pikamakiti pimisiritinina maerekati kamakani ĩkora atoko. <sup>6</sup>Kotxi ninoa okari kākiti pite nakitiakori. Okarina pisākire sāpiretakani. Ninoa oxiketari ninoa arēka. Ininiā uatxa pite sikana arēkatxi iātinina. Atāo imisiritikona kotxi maerekati ikamana —itxa Teoso nitiri.

<sup>7</sup> Iposo atoko nikenakotari āti sākire. Teosomoni sikakori takikoātaā auakari iua. Itxari Teoso:

—Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atāo inakaranoka pikama —itxa.

### *Āti lātatxi*

<sup>8</sup> Eereka ātipekana Teoso nitiri kitakari iātatxi ākikiri atokatximoni. Iuasaaki atokatxi apiata patakata. Auiritaāka kākiti arikini itaparapatakaā. <sup>9</sup> Ininiā kākiti arikaāka atokatxi patakaā. Iuaritika !inirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenaā akiritari Teoso uāka.

### *Āti lātatxi*

<sup>10</sup> Ininiā ipi ipi pakini Teoso nitiriakori kitakapekari iātatxi ākikiri itiximoni. Eereka iuaīkana āti Teoso nitiri kitakari iātatxi ākikiri auītetxi topaneremoni iua potxoari uiniti pokīkaātakari topaneremoni. Iuasaakipeka iua potxoari uinitikiri auītetxi ininiātaāua patimari ipiākini. Kākiti iuaātaā auakani akatsaninitaua itsii xika. <sup>11</sup> Iuaritika !inirekarina maerekati ikamakitina itakanapinina. Imisākirepiretarina Teoso iaxiti apiko nopinixiti auakari, atatsiirena xika, kimiti xika.

### *Āti lātatxi*

<sup>12</sup> Eereka iuaīkana Teoso nitiri āti kitakari iātatxi ākikiri mitari uinitimoni Eoparatxi inakorimoni. Iuasaaki uini auā. Isonāka. Kimapori itxaua, auītetxiakori atokatxi pokīkinimoni īkani inapinina īkapani. <sup>13</sup> Iposo atoko nitikari maerekani matamatakoni ipi āti pakini. Atiniro atoko itxana. Āto pokīka mitapoari imini namaā. Āto pokīka iua potxoari uiniti pokīkaātakari namaā. Āto

pokĩka iua itixi pokĩkakarĩ namaã. Iua itixi pokĩkakarĩ iua Satanasi sãkire sãpiretakarĩ itxaua. Na atãoene isãkire. Poxirari ikama. <sup>14</sup> Ninoa maerekani matamatakoni ipi ãti pakini Satanasi nitiriakori. Ninoa kamari posotiiretxi. Isana auĩtetxiakorimoni, ikini itixiti auakanimoni. Akiritana kãkiti apotiitiniua ineenamauatinina ĩkapani. Teoso kaposotiireri naiatanako ninoa itixi xipokini õtisaaki.

<sup>15</sup> Hĩte ia atatsopatakani, Apiananiri txai hĩte:

—Erepaniko. Napokako kiĩtiriri apokini atoko, kãkiti mimarotakinitipanika. Napokasaaki ereẽ, pikoatiniã, kamãka pininiã, pipoxokoniua. Ikara atoko pininiã, kona kasarai ikinimane apisatoõ pisini, ininiã kona kapẽtai —itxa Apiananiri sãkire.

<sup>16</sup> Eereka ninoa ipi ãti pakini Satanasi nitiriakori maerekani matamatakoni, apotiitari auĩtetxiakori Amaketõ inakoriãtaã. Iuaãtaã akiritaãka Amaketõ Xoteo sãkireẽ.

### *Imapotõkire Iãtatxi*

<sup>17</sup> Ninoa setxi Teoso nitiriakori, seihi kitakapekari iãtatxi ãkikiri. ãtinoka !ikitakapanikari. Iuasaaki iua kitakari iãtatxi ãkikiri ĩtimamoni. Iuasaaki nikenakotari auĩtetxi itopanereãtaã auakari sãkire:

—Ixipokapeka —itxa itaparakieneritika.

<sup>18</sup> Iposo atoko iotxira mẽkoãkata. Ikarokirauata. Pataparaeneri. Itixi iakeẽkata. Mitxi !auari itixi iakeẽkatini ĩkora atoko inakari. Iuasaaki karako apiatako. <sup>19</sup> Iua sitatxi apiari Papirõnia inakori xoreka. Ipikata ixoreka, ininiã ipi ãti pakini sitatxiti atoko itxaua. Ikini itixiti auakari sitatxi xipokaãka iuasaaki. Teoso limaxinĩkaretari Papirõnia sitatxiti auakani kamakiti, ininiã iteene imisir-itana ninoa, kotxi iteene omanãkarauata imaerekanina xika. <sup>20</sup> Iuasaaki ikini ipokomiriĩ !auaika. Õtanoxiratarĩ ikinipoko xipoka iuasaaki. <sup>21</sup> Katxĩkareri iaxiti auakari,

kai mitari atoko inakari, katxaka itiximoni. Apanakini kai minani koarêta sîko kiro. Iua irika kâkiti nopini. Ikara katxakakari pamonõkonipaniri. Iua xika kâkiti iteene misâkirepiretari Teoso.

## 17

### *Sito Potxoari Uinitikiri Nopini Topâkakaró*

<sup>1</sup> Ninoa Teoso nitiriakori setxi pakini iâtatxi setxi auakini, seisi kaikota. Âtika ina notamoni. Itxano nota:

—Notakata pisa. Noerekai sitatxi miramaneri. Sito kanokarero kaposotiirero atoko itxa iua sitatxi. Oa topâkanâta uini itori nopini. Iuaã auakani misiritiko no-erekaiko pite. <sup>2</sup> Auîtetxiakori ikini itixiti auakani kamari maerekati iua sitatxiti auakanikata isirîkinina. Iua sitatxi auakani txîkitakari kâkiti ikini itixiti auakani maerekati ikaminina. Kapoãroã poãtakari nirekini atokokana, ninoa nirekari iua maerekati iua sitatxiti auakani kamakiti — itxa notamoni.

<sup>3</sup> Eereka iua Erekari Matamatakoti paniâtano iua Teoso nitirikata nisini. Iua Teoso nitiri anikano âparaã makipakaniâtaã. Iuaã natamataro sito topâkanâta iua potxoari uinitikiri nopini. Põkamarãitori iua. Iïtoã aua iõkatakori kaiãopokori Teoso imisâkirepiretini iõka. Ikii setxi aua. Iko tesi aua. <sup>4</sup> Oa sito mãka pomamari ipixini. Põkamarari itxa omãka. Pakaroneri omãka. Oïtoã aua oro, pérora, kai soro pomêkoriri pakini aua. Omaïkari iãoanãtxi oro kamakori. Iua iãoanãtxi âki aua maerekati okamakiti itxiko atoko inakari. Maerekati oïto kamakiti ikara atoko itxa. <sup>5</sup> Oteêtaã aua sâkiretxi iõkatakori. Itxari: “!Kimarotikori. Kanokareroakoro inoro itxaua Papirónia sitatxiti miramaneri. Maerekati kamakani inoro itxaua Papirónia.” <sup>6</sup> Nitikaro oa sito opoãtini, Teoso nakitiakori arêka oâtini xika. Xesosi sâkire auikinina xika, okaãkana. Natamatakasaakiro nitikoka.

—Kipa atxiïti? —nitxa.

<sup>7</sup> Iua Teoso nitiri txano:

—Kininiāpa pitikoka? Nisāpiretaiko oa sito pirena. Apaka nisāpiretaiko iua potxoari uinitikiri pirena, ikii setxi, iko tesi auakiti pirena, oa porikitakari pirena nisāpiretai, kotxi kona pimarotari. <sup>8</sup> Iua potxoari uinitikiri patamatakiti mitxi aua, txamari uatxa !auaika. Iua eereka ipokikapanikako aariko mamapotōkire irikotiā. Eereka anikaākako ixipokikomoni. Ikini itixiti auakani Teoso aātsopateē iuākana maiōkatakoni tikokako iua potxoari uinitikiri atamatakasaakinako. Itixi kamiko apisa iuākana !iōkatsopataāka Teoso aātsopateē. Iua aātsopaā iōkauākatakonioka ātipirika auapikako Teosokata. Kākiti tikokako iua potxoari uinitikiri atamatakasaakina, kotxi mitxi auāki itxa, eereka !auaika, eereka iuaikana auākipeka itxa.

<sup>9</sup> —Ikara inakari pimarotini ikapani, iteene pimixinikariko. Kinirepa ikii setxi aua? Kotxi ōtanoxiratari setxi apaka aua. Oa sito topākanāta iua ōtanoxiratari nopini. <sup>10</sup> Kinirepa ikii setxi aua? Kotxi auītetxiakori setxi apaka auako. Auītetxi !itxaikauana ninoa sīko. Ātinoka auītetxi txapanikaua. Āti kona apokapanika. Iua apokasaaki mapaōtinoka auītetxi itxauako. <sup>11</sup> Iua potxoari uinitikiri mitxi auāki inakari, iposo atoko !auaika inakari, iua apokako. Iuara auītetxi txauako. Iua mitxi apotiitaua ninoa setxi auītetxiakorikata. Āti ōti iua xipokaākako.

<sup>12</sup> —Patamatari iko tesi pakini. Kinirepa iko tesi aua? Kotxi auītetxi tesi aua. Ninoa auītetxiakori kākiti auīteakori !itxapanikauana. Ninoa sikaposotiiretaākako auītetxi ininiuana iua potxoari uinitikirikata. Ninoa auītetxi itxauanako āti oaranoka. <sup>13</sup> Ikininape ninoa tesi auītetxiakori parīkauata iua potxoari uinitikiri ikapani. Iposotiireēna, itaparaāna iparīkauatana iua potxoari uini-

tikiri ìkapani. <sup>14</sup> Inaiatarinako Teoso Soti Auĩtene. Teoso Soti Auĩtene iokanatana ninoa isinina, kotxi iuanani Api-ananiri itxaua. Auĩtetxiakori auĩte itxaua. Ātipirika iuakata sikani, iua akiritakini, imereēkini, ātipirika iua nireēkiti kamakani, ninoa moianatari iua Soti Auĩte ineenamauatini —itxa Teoso nitiri sākire.

<sup>15</sup> Iua Teoso nitiri apikomoni txari notamoni:

—Pite atamataro oa kanokarero topākanāta kāuaāri nopini. Kinirepa kāuaāri nopini oāua? Kotxi iuaātaā kākītipokoni, ikini uāka, ikini itixiti auakani, ikini āti uāka sākire sākiretakani pakini. Iua kāuaāri mitari atoko itxana. <sup>16</sup> Iua potxoari uinitikiri, ninoa tesi auĩtetxiakori pakini omanataroko oa kanokarero. Ninoa makatxakariko ikinipoko oa nakiti. Imakatxakaranako omāka. Kasarapeka otxako. Oxini inikanako. Ninoa xipokaroko oa xaminaā. <sup>17</sup> Teoso txīkitakari Teoso nireēkiti ikaminina, kotxi ninoa auĩtetxiakori parīkauata iua potxoari uinitikiri ìkapani Teoso nireēkiti iaōka. Ininiā Teoso sākire mitxi auakari auapeka. Isākire iaōka ikamana. Ininiā ninoa nirekari iparīkauatinina iua potxoari uinitikiri ìkapani. Ininiā ninoa auĩtetxiakori itxauana iua potxoari uinitikiri ìkapani.

<sup>18</sup> —Oa sito kanokarero patamatakito kona atāo sitoni. Sitatxi miramaneriā auakani oa sito kanokarero atoko itxana, kotxi iua sitatxiā auakani paniātana ikini auĩtetxiakori itixi auakani maerekati inireēkitina ikaminina.

## 18

### *Papirónia Sitatxiti Xipokini*

<sup>1</sup> Ikara inaāka atoko nitikari āti Teoso nitiri Teoso tixine auakari katxakaāpotini ìkorapokoriti Teoso tixine potoriākari. Iua kaposotiireri. Iotximere iopinikari ìmakinika itixi. <sup>2</sup> Iua sākirauata itapasākireritika. Itxari:

—Ixipokapeka Papirónia sitatxiti miramaneri. !Auaika. Uatxa Satanasi nitiriakori aua iuaã. Ikini sereti maerekani matamatakoni aua iuaã. Araãkari ikini sereti arakakari nikakani, kãkiti mapokaerekatakiniti, iuaã apoka. <sup>3</sup> Oa sito kanokarero atoko itxa iua sitatxi, kotxi iua sitatxi auakani txĩkitakana ikini itixiti auakani maerekanitxi ninoakamakiti iaõka ikaminina. Papirónia sitatxiti auakani kamari maerekati iĩtona nireëkiti. Itixi auakani nirekari ikara maerekati ikaminina kapoãroã poãtakari nirekini atokokana. Auĩtetxiakori ikini itixiti auakani kamari ikara maerekati Papirónia sitatxiti auakanikata. Tiitxi vëtxitakani apakaparo txineiro kaiãopokoro, kotxi Papirónia sitatxiti auakani amotari tiitxipokoni —itxa Teoso nitiri sãkire.

<sup>4</sup> Eereka nikenakotari ãti Teoso tixine auakari sãkire. Itxari:

“Hĩte nota nakitiakori inakani takanapariko iua sitatxi. !Hĩkamapiri maerekati ninoakata. Ininiã !himisiritaãka ninoakata.

<sup>5</sup> Kotxi maerekati ninoakamakiti apiaãpota. Tiitxi tsorinatakori atoko itxana ninoakamakiti. laxitipeka apokaãpota ninoakamakiti. Teoso xinikari ninoakamakiti, ininiã iua misiritanako ninoakamakiti.

<sup>6</sup> Himisiritanako ninoakamakiti. Hĩte imisiritinina atokokana, hĩte misiritana ninoakamakiti. Ipikata himisiritanako ninoakamakiti, ninoakamakiti maerekani xika. Ninoakamakiti misiritapekari apanakini, ininiã ia imisirikarena xika ipikata himisiritanako ninoakamakiti.

<sup>7</sup> Hĩtxĩkitakanako ninoakamakiti atatsiirauatinina. Hĩtxĩkitakanako ninoakamakiti maerekaxiniretinoka ininina. Ikara atoko ninoakamakiti hĩkaminiã, atãopitikara hĩkamakiti, kotxi iteene iukauana ninoakamakiti. Ito-maneri itiina, ininiã ninoakamakiti iarinouata. Ninoakamakiti sãkire: ‘Ate uai topãkanãta, kotxi auĩtetxi kaposotiireni atxaua. Tikinitakoro atoko !atxaua,

ininiã maerekaxiniretika ! atxa, itxana ãkix-  
inireëna.

<sup>8</sup> Ikara isãkirena xika ãti õti ninoa misiritaãkako. Amianari, maerekaxinirenitxi, natxi pakini apokako ninoamoni. Arikatxi xipokanako ninoa, kotxi Teoso iuasaaki misiritanako ninoa. Imisiritanako ninoa, kotxi Teoso Apiananiri Kaposotireri itxaua,”

itxa iua Teoso tixine auakari sãkire.

*Kãkiti Txiapatini Siatxiti Xipokini Xika*

<sup>9</sup> Auĩtetxiakori ikini itixiti auakani, Papirõnia sitatxiti auakanikata sirĩkakani, ninoakata tiitxi apokaerekatakani, itikasaakirina iua sitatxi misiritiko, iteene itxiapatana. Ninoa auĩtetxiakori txiapata iua sitatxi arikasaaki, xamina txiã itikasaakina. <sup>10</sup> Õtakoxiti itimana, kotxi ipĩkarina sitatxi auakani xipokini. Iuasaaki itxanako:

—! Erekarı. ! Erekarı. Ia sitatxiti miramaneri ! auaika. Papirõnia sitatxiti !auaika. Kãkiti kaposotiirerini xipokapeka. ãti oaranoka arikatxi xipokapena ninoa imaerekanina xika.

<sup>11</sup> Ikini itixiti tiitxi vëtxitakani apaka txiapatato. Ninoa maerekaxinireninoka itxanako sitatxi auakani xipokasaaki.

—Kiripa amotatari atii uatxa? —itxana.

<sup>12</sup> Mitxi ninoa vëtxitari oro, pirata, kai soro pomëkoriri, kai soro kasarori përorı inakori. Mitxi ivëtxitarina mãkatxi mata arınio inakori, mãkatxi mata seta inakori, mãkatxi mata põkamarari, mãkatxi mata pomamari pakini, ivëtxitana. Ivëtxitarina ikini sereti aamina eremari inakori. Ivëtxitarina ikini sereti tiitxi iko kamakori, aamina pakaroneri kamakori, pirõsi kamakori, metao kamakori, kai kamakori. <sup>13</sup> Ivëtxitarina kanera, koketxi pakini. Ivëtxitarina kamariãro miha inakori. Ivëtxitarina kamariãro pirãkĩsësi inakori. Ivëtxitarina iãriã, aseitona

iï, triko, triko pani pakini. Ivêtxitarina kema auïte, soti auïte, kavaro, mitekaï kavaro anikakiti pakini. Kâkiti apaka ivêtxitana, nitiritxi ïkapani. Kâkiti ïto, kâkiti xinire apaka inirekana ivêtxitinina. <sup>14</sup> Ninoa tiitxi vêtxitakani sâkire sitatximoni:

—Ikinika hïtii erekari hinireêkiti xipokaãkapeka. Ikinika hïtxineirote !auaika. !Auaika hâpokaerekatakiti. Hïtii arikapeka —itxana ninoa sâkire.

<sup>15</sup> Ninoa tiitxi vêtxitakani katxineiroterini itxauana, kotxi kâkiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi vêtxitakani timanâta ôtakoxiti, kotxi ipïkarina sitatxi arikini. Itxiapatana. Imatinaniuatana. <sup>16</sup> Itxana:

—!Erekari. Sitatxi miramaneri !auaika uatxa. Mitxi ia sitatxi peerepokori sito erero atoko itxa. Oia sito mâka pakaroneri, pomamari, pôkamarari pakini. Oïtoã aua oro, kai soro pomêkoriri. Pérora pakini aua. Oia sito atokokana ia sitatxi. <sup>17</sup> ãti oara napa atoko ia sitatxiã auakani tii kakaroneri xipokapeka —itxana.

Sitatxi arikasaaki, maporo auakini, maporo âki sikani, maporo âki parïkauatakani apaka ôtakoxiti atamatarina iua sitatxi arikini. <sup>18</sup> Ninoa itikasaakiri katxiãri iua sitatxi arikini, itxana:

—Ia sitatxi miramaneri atoko inakari !auari —itxana ninoa.

<sup>19</sup> Iuusaaki itakarina atapani ikiïãna imatinaniuatiniãna. Itxiapatana iuusaaki. Imatinaniuatana iuusaaki. Itxarina:

—!Erekari. !Erekari. Kamatinanipitikari sitatxi miramaneri xipokini. Mitxi iuaã ikinimane maporo auakini apakapari kaiãopokoro txineiro, kotxi iuaã auari txineiopokoni. Eereka ãti oara napaka atoko ixipokapeka ikinika —itxana isâkirena.

<sup>20</sup> Hĩtepekana Teoso tixine auakanii hĩpoxokoniuatoko iua sitatxi xipokiniã. Hĩte Teoso nakitiakori hĩpoxokoniuatoko. Hĩte Xesosi moianariakorii, hĩte Teoso sãkire sãpiretakanii pakini hĩpoxokoniuatoko, kotxi Teoso arikapekari iua sitatxiã auakani hĩte imisiritinina xika.

*Kai Miramaneri Potxoari Uinitimoni Okiko*

<sup>21</sup> Eereka ãti Teoso nitiri kataparari maĩkari kai meraminapoari. Kai triko kamiriãkari atoko itxa iua kai. Okari potxoari uinitimoni. Iua txari:

—Itapararitika kai nokini atoko, Papirónia sitatxiti miramaneri xipokini. !Atamataãkaika sitatxi iuaã —itxa isãkire.

<sup>22</sup> Itxari iua sitatximoni:

—Xikari !ikenakotaãkaika ereẽ. !Auaika xikari viorãokata, koitxikata, trõpeta pakinikata. Ereẽ kãkiti parĩkauatini !auaika. Atarokiri kamiko ene !kakenakotikoikari. <sup>23</sup> Tirikapi kamara !katamatikoikari ereẽ. Taniriuatakani kiinirite ene !kakenakotikoikari. Ereẽ mitxi vëtxirauatakani apiari itxauana. Ninoa atoko inakari !auari ikini itixiti. Kãkiti ereẽ auakani misirienetana ikini kãkiti ikini itixiti auakani, kotxi ninoa sãkire maerekatinoka —itxa Teoso nitiri sãkire.

<sup>24</sup> Papirónia sitatxiti misiritaãka, kotxi iuaã auakani okapena Teoso sãkire sãpiretakani kãkiti Teoso nakitiakori. Ikinimane kãkiti itixi okakoni xika Papirónia sitatxiti xipokaãka.

## 19

*Areroia, Peerekari Teoso*

<sup>1</sup> Eereka nikenakotari kãkiti sãkire, kaiãopokori kãkiti Teoso tixine auakani. Itapasãkিরeritikana itxana:

—Areroia. Peerekari Teoso. Ate Teosone makatxakari kãkiti maerekani. Kaiotximereri aTeosone. Kaposotireri. <sup>2</sup> !Ikerokari ikamakiti, kotxi atão inakaranoka ikama,

ininiã atão imisiritinina maerekati kamakani. Erekarinoka ikama aTeosone. Iua misiritari Papirónia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kãkiti xinire ikini itixiti auakani xinire, kotxi oerekarina maerekati itotxi nireẽkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sãkire.

<sup>3</sup> Iuaĩkana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ãtipirika —itxana.

<sup>4</sup> Iuusaaki ninoa totiakori vĩtxi koatro pakini, ninoa okĩtxinoka xãpokaĩtotakini ipi ipi pakini apaka, ipamakana Teoso apisatoõ. Iuusaaki Teoso topãkanãta auĩtetxi topanere nopini. Ninoa misãkiretari iua:

—Pite aTeosone. Peerekai pite. Ameẽ, areroia —itxana ninoa.

### *Soti Auĩte Itanorouatini Kiiniriti*

<sup>5</sup> Eereka nikenakotari Teoso topanereẽ auakari sãkire. Itxari:

—Hĩte Teoso nitiriakori ikini itixiti auakanii, “Peerekari aTeosone” hĩtxako. Hĩte auĩtetxi inakanii, auĩtetxi minakanii apaka, hĩpĩkiniãri Teoso, “Peerekari aTeosone,” hĩtxako —itxa.

<sup>6</sup> Iposo atoko nikenakotari itomaneri kãkiti sãkire ene atoko itxa, ãparaã kai auiniãtaã auakari ene atoko itxa, ikarokirauatini ene atoko itxa. Nikenakotari ninoa sãkire:

—Areroia, peerekari Teoso, kotxi aTeosone, Apiananiri, kaposotiireri, ikinimane auĩte itxaua —itxana ninoa.

<sup>7</sup> —Mapoxokoniuata. Apoxokoniritika masãkirauata. Matxari: “Peerekari Teoso.” Teoso Soti Auĩtene itanorouatini iketo apokapeka. Itaniriuatakaru iua ikapani oãiamatapeka. <sup>8</sup> Osikaãka mãkatxi ereri, kasarori oieretaãkiti tĩkane —itxana ninoa sãkire.

Teoso nakitiakori kamakiti atão inakari oa mãka atoko itxa.

<sup>9</sup> Iposo atoko iua Teoso nitiri txano nota:

—Ia piõkatsopata. Iua Soti Auíte ïtanorouatini kiiniriti kemaïtxitakoni poxokoniuaata —itxa notamoni.

Iuaïkana itxano:

—Ia nisãpiretakiti Teoso sãkire atão itxa.

<sup>10</sup> Ikara nikenakotakasaaki nipamaka iua Teoso nitiri apisatoõ, Teoso apisatoõ pamaãkarino atoko nitxaua. Txamari iua txano:

—Kona pipamakape nota apisatoõ. Nota Teoso nitiri pite atoko, pitariakori Xesosi sãpiretakiti auiãkani atoko. Teoso apisatoõnani pipamakako. Xesosi sãpiretakiti iopinikari Teoso sãkire sãpiretakani ãkixinire. Ininiã ninoa sãpiretari kãkiti atão Teoso sãkire —itxa.

### *Kavaro Kasarori Nopini Topãkakari*

<sup>11</sup> Eereka natamatari Teoso tixineẽ auakari. Natamatari kavaro kasarori. Iua kavaro nopini topãkakari ikamaenetakiti kamakari itxaua. Isãkire atãonoka. Atão imereẽri kãkiti misiritiko imaerekani xika, kotxi iua imarotari ikinipoko kãkiti kamakiti, ininiã ikamari atão. Inaiatana maerekati kamakani, kotxi iua kamari atão. <sup>12</sup> Oki xamina tirinakari atoko itxa. Ikiiã ito auïtetxi saporietane aua. Iuãka iõkatakori iïtoã aua. !Kimarotikori iua uãka. Iuanoka imarotari iuãka. <sup>13</sup> Arëkatxinoka imãkaã aua. Iua akiritaãka, “Teoso Sãkire” inakori. <sup>14</sup> Isotatoneakori, Teoso nitiriakori Teoso tixine auakani, saãpota iuakata. Iua ïkiika. Ninoa apaka topãka kavaro kasarori nopini. Imãkana peereri, kasarori. <sup>15</sup> Iua “Teoso Sãkire” inakori namaã opokika iouata mitaro neenamatchi ikamini ïkapani. Kauanaro. Iua iouataneẽ okanako imokaiakarini ikini ãti uãka, ininiã ikini ãti uãka auíte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanãkare ova katxaratiko atoko itxako. Teoso iteene omanãkarauata iusaaki kãkiti maerekani

xika. <sup>16</sup> Iua “Teoso Sãkire” inakori mãkaã, itapikeẽ apaka iøkataãka: “Auĩtetxiakori auĩte. Apiananiri,” iøkataãka.

<sup>17</sup> Iposo atoko natamatari åti Teoso nitiri. Atokatxi iotximereẽ itima. Iua itaparakieneritika akiritari ikinika itano araãkani:

—Hina. Hãpoka Teoso kiiniritemoni. Mitari ikiinirite —itxa.

<sup>18</sup> —Hina. Auĩtetxiakori xini hinika. Sotatoakori auĩteakori xini hinika. Sotato xini apaka hinika. Kavaro xini hinika. Hinikari kikiãkini kavaro nopini topãkakani xini apaka. Hinikari ikini kãkiti xini, nitiritxi iamotakoni xini, nitiritxi minakaniua xini, kãkiti apiatakani xini, kãkiti mapiatakani xini apaka hinika —itxari itano araãkani.

<sup>19</sup> Eereka nitikari iua potxoari uinitikiri. Iuakata aua itixi auakani auĩteakori, isotatoneakori apaka. Nino a potiiitaua, iua kavaro kasarori nopini topãkakari isotatoneakorikata inaiatinina ãkapani. <sup>20</sup> Iua neenamtxi xipoka atoko, iua potxoari uinitikiri mãkaãka. Isãkire sãpiretakari, atão minasãkiretakati, imaikaãka apaka. Mitxi iua kamari posotiiiretxi iua potxoari uinitikiri ãkapani. Ikara posotiiiretxi xika imisiriene-tana ninoa potxoari uinitikiri takaõtxikare auaitotakini. Imisiriene-tana ninoa iua kai kamakori teosonetakani. Iua potxoari uiniti pokãkaãtakari, isãkire sãpiretakari pakini, auãkipanika okaãka ipoa atoko inakarimoni, êxõpiri arikiniãtaã. <sup>21</sup> Isotatoneakori okapeẽka iouataã, kavaro kasarori nopini topãkakari namaãkeroã. Iuasaaki ikinika maiori nikapena ninoa xini. Kamitopekana. !Iposotaikarina ikinika okakoni xini inikinina.

## 20

### *Mio Anokananisaaki*

<sup>1</sup> Eereka nitikari Teoso nitiri katxakaãpotini Teoso tixine ãkari. Iuakoã iua minaro xavi iua mamapotõkire

irikotimoni. Apaka iminari kohētxi mitari. <sup>2</sup> Iuasaaki imaĩkari iua imini mitapoari. Kitxakapirĩkarikara iua imini. Iua maerekani matamatakoni auĩte, Satanasi inakori. Iua maĩkari Satanasi. Iaxirikari kohētxiã, mio anokanani imatĩpokotakani tĩkane. <sup>3</sup> Iua Teoso nitiri okari Satanasi iua aarikoã, tota itxari itore. Ikakiriokari oa xavi itore sonaã, ininiã lapakata itore matakakiko. Ininiã mamapotõkire irikoti ãki ikaikota Satanasi. !Iposotaikari imisirienetiniri ikini itixiti auakani. Mio anokanani auako iriko ãki iua Satanasi. Mio ano napaãka atoko auiritaãka ipokĩkini. Mapaõtinoka auiritaãka mapara auini.

<sup>4</sup> Eereka natamatari auĩtetxiakori topanere. Kaiãopokori auari iuaã. Natamatari iua topaneretxi nopini topãkakani. Ninoa txĩkitaãka auĩtetxi ininiuana. Iuasaaki natamatari apanakini kãkiti. Mitxi sauakanopitakoni. Okapeẽkana Xesosi iokanapirena, Teoso sãkire pakini isãpiretinina xika. !Iteosonetarina iua potxoari uinitikiri. Iua kai kamakori !iteosonetana. Iua potxoari uinitikiri takaõtxikare !itakana iteẽtaãna, iuakoãna pakini. Iuaĩkana auapekana. Auĩtetxi itxapekauana Kristokata. Mio anokanani auĩtetxi itxauana. <sup>5</sup> Ikara ipĩkani õkitikiko merepanika ipĩkani õkitikiko. Iua mio anokanani napaãka atoko apanakini ipĩkani õkitikaãka. <sup>6</sup> Ipĩkani merepanika õkitikiko iuaĩkana auãki ininina ĩkapani, Teoso nakitiakori itxauana ninoa. Teoso sikari erekari ninoamoni. ! Atatsiitarina ãtião ipĩkitxi Teoso misiritakasaakina maerekati kamakani. Sasetotxi itxauana, kotxi Teoso nireẽkiti ikamana. Kristo nireẽkiti apaka ikamana. Mio anokanani auĩtetxi itxauana Teosokata.

*Satanasi Xamina Mitapoarimoni Okiko*

<sup>7</sup> Mio ano napaãka atoko, Satanasi kateia ãki auakari, sikakaãkako. Ipokĩka mapara. <sup>8</sup> Iuasaaki Satanasi ĩpirixititari itixi kãkiti ikini ãti uãka imisirienetini ĩkapani. Iua

misãkiretari áti uãka Koki inakori, Makoki inakori pakini. Txamari na atão isãkire. Inirekari ninoa neenamauatini iuakata. Apitiitana ninoa Teoso nakitiakori inaiatinina ìkapani. Itori kãkiti Satanasi apotiitakini. Uini ikipatxite atoko itxana.

<sup>9</sup> Ìpirixitarina itixi. Iakirokarina Teoso tiretakiti sitatxiti, kãkiti Teoso nakitiakori auiniãtaã. Iuasaaki xamina iaxitikiri katxaka. Ixipokana ninoa ikinikana. <sup>10</sup> Iuasaaki Satanasi, kãkiti misirienetakari, okaãka arikatxi mitapoarimoni êxópiri arikikoãtaã. Iua potxoari uinitikiri, isãkire sãpiretakari pakini okapeêkaika iuaã. Iuaã ninoa atatsiirauatapikako pokamara, ìkanõka átìpirika. !Ixipoka ninoa atatsiirauatini.

### *Ipinakani Apakapari Iparìkana Ìki*

<sup>11</sup> Eereka natamatari auítetxi topanere kasarori mitari. Natamatari iua inopini topãkakari. Iuasaaki patimari iaxiti, itixi pakini ereêkokini iua topãkakari apisatoõ. Iaxiti, itixi pakini kona katamatikoikari. <sup>12</sup> Iposo atoko natamatari kãkiti mitxi ipinakani timini Teoso topanere apisatoõ. Kãkiti apiarini, kãkiti poiãorini pakini tima Teoso apisatoõ. Iposo atoko itori aãtsopa katamêkitataãka. Iua aãtsopaã aua ikinika kãkiti kamakiti. Apaka áti aãtsopa katamêkaãka. Kãkiti uãka aua iua aãtsopaã Teosokata auakani ìkapani. Iuasaaki ninoa mitxi ipinakani apakapari ikamakitina ìki uai itixiã auakasaakina. <sup>13</sup> Ninoa mitxi potxoari uiniti ãki ipinakani apoka iuaã. Mitxi kipatxiã ikatakoni apaka apoka iuaã. Ikini kãkiti ipìkani auiniãtaã auakani apoka iuaã. Ikinika apakapari ikamakitina ìki, ikamakitina itixiã auakasaakina. <sup>14</sup> Eereka ipìkitxi, ipìkani auiniãtaã pakini okaãka iua arikatxi mitapoarimoni. Iua arikatxi mitapoarimoni iuaìkana kãkiti ipina átião ipìkitxi maxipokatimoni.

<sup>15</sup> Kãkiti ãtipirika Teosokata auakani uãka aua Teoso aãt-sopateẽ. Kãkiti iuaã mauauãkatakani okaãka iua arikatxi-moni.

## 21

### *Iaxiti, Itixi Pakini Amaneri Txapekaua*

<sup>1</sup> Eereka natamatari iaxiti amaneri, itixi amaneri pakini. Iaxiti mitxiri ereẽkokape. Ìkora itixi mitxiri ereẽkokape. Potxoari uiniti !auaika. <sup>2</sup> Natamatari Teoso sitatxine Xerosareẽ amaneri. Iua sitatxi Teoso tixinekiri. Teoso paniãtari iua sitatxi ìkorapokoriti apokini. Natamatari ikatxakaãpotini. Iua sitatxi peereri. Sito ìtanir-iuatakasaaki, omãka peereri oìtanirimoni osini ìkapani. Oa sito erero atoko itxa iua sitatxi. <sup>3</sup> Nikenakotari Teoso topanereẽ auakari sãkire. Itapasãkireritika itxari:

—Uatxa Teoso kamari iua auini kãkiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua. <sup>4</sup> Iuasaaki iua kaxipokariko ninoa oki ãtsaã. !Itxiapataikana. Ipìkitxi !auaika. Matinanitxi !auaika. Ìtsaãtxi !auaika. Katsiiri !auaika. Ikinipoko mitxiri ereẽkokapeka uatxa —itxa.

<sup>5</sup> Iua auìtetxi topanere nopini topãkakari txari:

—Uatxa nikamari ikinipoko amaneri —itxa.

Apikomoni itxari notamoni:

—Piõkatsopatari nisãkire, kotxi nisãkire atão. Nisãpiretakiti apokapitikako.

<sup>6</sup> Apikomoni itxano:

—Uatxa nipařika xipopeka. !Auaika. Merepitipanika iõka Aopa inakori atoko nitxa, kotxi nota merepitipanika aua. Imapotõkire iõka Ómika inakori atoko nitxa, kotxi ikinipoko mapotõkire nitxaua apaka. Nisikari kãkiti posonatakani iãtini ìkapani. Na ninirekari iiki. Iãtari-nako ãparaã amomoãkiri. Iua ãparaã txìkitakari kãkiti ãtipirika Teosokata auini. <sup>7</sup> Nisikariko iua ãparaã kãkiti

Satanasi nireëkiti makamakanimoni. Ninoa Teosone nitx-  
 aua nota. Nota anaakori itxauanako ninoa. <sup>8</sup> Kãkiti mat-  
 aparaxinireni okaãkako xamina mitarimoni. Teoso sãkire  
 mauikakani apaka okaãkako iua xaminamoni. Maerekati  
 potxitakani, kokanirini, maerekati iïtoãna potxitakiti ka-  
 makani apaka okaãkako xamina mitapoarimoni. Miïti  
 apaka okaãkako iuamoni. Teoso kamakori teosonetakani  
 okaãkako iuamoni. Ikinika kãkiti maxikatiïka sãpire-  
 takani apaka okaãkako xamina mitarimoni. Ninoa kãkiti  
 ikinikana misiritaãkako arikatxi mitariã, ëxópiri arikikoã-  
 taã. Iuaã kãkiti iuaïkana ipina, ãtião ipïkitxi maxipoka-  
 timoni —itxa iua auïtetxi topanere nopini topãkakari  
 sãkire.

*Xerosareë* Sitatxiti Amaneri

<sup>9</sup> Ninoa Teoso nitiriakori setxi, iãtatxi setxi auakini, ãti  
 ina notamoni. Iua txari:

—Uai pina. Noerekaiko pite iua Soti Auïte tiretakito  
 ïtanoro ïkapani —itxa.

<sup>10</sup> Iua Erekarì Matamatakoti anikano nota. Itxïkitakari  
 Teoso nitiri anikinino oxiratari nopini. Mitaxiratariã  
 oerekano sitatxi Teoso nakiti Xerosareë inakori. Nata-  
 matari iua sitatxi Teoso tixine potoricakari katxakaãpo-  
 tini ïkorapokoritimoni. <sup>11</sup> Teoso iotximeretxikana aua  
 iua sitatxi. Kai pomëkoriri kakaroneri xásipi inakori  
 mëkorïkini atoko itxa iotximere. Iua sitatxi iotximere  
 peereri. Kristao mëkori atoko itxa. <sup>12</sup> Pirikeri kai  
 kamakori piriketari iua sitatxi. Iua pirikeri mitapoari,  
 païtanori. Iua pirikeri tosi itore aua. Teoso nitiriakori  
 iaxitikini tosi nïkatari iua tosi itore. Ikinika itore nopini  
 iökataãka Isaeo anaakori uãka, kotxi Isaeo tosi imiakori  
 aua. <sup>13</sup> Ipi ãti pakini iua itore atokatxi pokïkinimoni. Ipi  
 ãti pakini iua itore atokatxi pokïkini sanaremoni. Ipi  
 ãti iua itore atokatxi pokïkini ikikomoni. Ipi ãti pakini  
 iua itore atokatxi ereëkokinimoni. <sup>14</sup> Iua sitatxi pirikere

tosi kai mitari nopini ikamaãka. Ikinika iua kai nopini Soti Auíte moianariakori uãka iõkataãka, kotxi Soti Auíte moianariakori tosi aua.

<sup>15</sup> Iua Teoso nitiri notakata sãkirauatakari aua aãke oro kamakori iuakoã. Iua aãke iua sitatxi, itore, ipirikere pakini iaõtiko. <sup>16</sup> Sitatxi tore atokatxi pokĩkinimoni ipotorika. Itore atokatxi ereëkokinimoni apoka. Iaõtari ipi mio, koatrosëtosi pakini kirómetro. Maioakari. Iuaĩkana ipotorika sitatxi itore atokatxi pokĩkini sanaremoni. Itore atokatxi pokĩkini ikikomoni apoka. Iaõtari iua atokotxikana ipi mio, koatrosëtosi pakini kirómetro. Eereka iaõtari sitatxi ãtano timakari. Iua atokotxikana ipi mio, koatrosëtosi pakini kirómetro. Iua Teoso nitiri iaõtari iua sitatxi iua aãkeẽ. <sup>17</sup> Iua Teoso nitiri iaõtari pirikeri timakari. Sesëta metro ãtano. Teoso nitiri iaõrauata kãkiti iaõrauatini atokokana. <sup>18</sup> Iua pirikeri kai kamakori xásipi inakori. Iua sitatxi oro kamakori. Kristao erero atoko itxa oa oro. <sup>19</sup> Iua kai mitari pirikeri patapi auakari ipataãka ikini sereti kai soroã. Pomëkoriri, kakaroneri iua kai soro.

Ãti iua kai mitari aua kai soro xásipi inakori.

Ãti iua kai mitari aua kai soro sapira inakori.

Ãti aua ákata inakori.

Ãti aua esimeráota inakori.

<sup>20</sup> Ãti kai mitari aua kai soro satónia inakori.

Ãti kai mitari aua kai soro sátxio inakori.

Ãti aua krisórito inakori.

Ãti aua periro inakori.

Ãti aua topásio inakori.

Ãti aua krisópraso inakori.

Ãti aua xasĩto inakori.

Ãti aua ametxísita inakori.

<sup>21</sup> Iua tosi itore tosi kai kasarori kamakori. Iua kai kasarori pérora inakoro. Iua itore ãtika, pérora ãtoka kamakori. Oro kamakori itxaua kimapori. Peereri. Pomëkoriri. Kristao atoko itxa ahoa.

<sup>22</sup> Kona natamatarì Teoso misäkiretiko aikoti. !Auari iua aiko iua sitatxiã, kotxi Teoso Apiananiri kaposotiireri, iua Soti Auïte apaka iuaã auapikana. <sup>23</sup> Iuaã !inirekaãka atokatxi, kasiri pakini sitatxi iopinikini ïkapani, kotxi Teoso iotximere iopinikari ikinipoko. Iua Soti Auïte sitatxi tirikapite atoko itxaua. <sup>24</sup> Kãkiti maerekanitxi mauakini ikini äti uãka auari iua kamaraã. Kãkiti ikini itixiti auakani auïteakori apokako iuaã Teoso ipaxitinina ïkapani, inirekakitina Teosomoni isikinina ïkapani. <sup>25</sup> Iua sitatxi tore imatakakaãkapika. Ìroãpikana kãkiti. !Ito-taãka, kotxi ïkanõkari !auari iuaã. <sup>26</sup> Kãkiti ikini itixiti auakani anikariko ikinipoko erekari iua sitatximoni Teoso ipaxitinina ïkapani. <sup>27</sup> Kãkiti maerekati kamakani !auri-taãkana ïroinina. Ìtotxi nireëkiti kamakani !auritaãkana ïroinina. Atão masãpiretakani apaka !auritaãkana ïroinina. Kãkiti Teoso iõkauãkatakini aãtsopateë, ninoanokara auritaãka ïroinina iua sitatxitiã. Iua Soti Auïte aãtsopateë auauãkatakani auapikako Teosokata.

## 22

### *Iua Æparaã Iãtakari Aua Teosokata Ætipirika*

<sup>1</sup> Eereka iua Teoso nitiri oerekano sõtoãri. Iua sõtoãri mapotõkire ikiitaã Teoso itopanere aua. Apaka iua Soti Auïte itopanere aua iuaã. Iua Æparaã peereëri. Kristao mẽkõri atoko itxa iua Æparaã. Iua Æparaã iãtakari !ipina. Ætipirika auapika. <sup>2</sup> Iua sitatxi apanïkaki aua ahoa mitapoari. Iua sõtoãri sa ahoa apanïkaki. Sõtoãri ïtinikata aua amãtiirinape. Iua amãtiiri tximakani !ipina. Auapikana. !Ipinaikana. Kasiri iaõka iriuata iua amãtiiri. Æti kasiriti iri Ætião, eereka äti kasiriti Ætião. Iuaïkana äti kasiriti Ætião. Itxaãpota iua amãtiiri iriuatini iuaxiti. Tosi pakini kasiriti amãtiiri iriuata. Amãtiiri tsopa sikata-paratari kãkiti ïto, ikinimane kãkiti itixi auakani ïto.

<sup>3</sup> Teoso misiritiniri kǵkiti !auaika. Teoso, Soti Auĩte pakini auĩtetxi itxauana iuaã. Teoso nitiriakori itixi auakani kamari iua nireẽkiti. <sup>4</sup> Ninoa atamatariko itoõ. Teoso uãka iteẽtaãna auako. <sup>5</sup> Īkanõka !auaika iuaxiti. Kǵkiti iuaã kona nirekaikari tirikapi, atokatxi kamara pakini, kotxi Teoso Apiananiri iopinikari ikinika iuaã. Kǵkiti iuaã auakani auĩtetxiakori itxauana ātipirika.

<sup>6</sup> Eereka iua Teoso nitiri txari notamoni:

—Atāo nisǵkire. Ia iaõka apokapitikako. Teoso Apiananiri sikari Erekari Matamatakoti isǵkire sǵpiretakanimoni. Iua paniātari initiri itixine auakari oerekinina initiriakori itixi auakani Teoso kamakiti apokini apisapanika —itxa iua Teoso nitiri sǵkire.

*Xesosi Kanapiriini Pirena*

<sup>7</sup> —Hĩkenakota —itxa Xesosi. —Patimariko napokini ereẽ. Ia aãtsopa sǵpiretari ereẽ nikanapiriini pirena. Kǵkiti auikiniāri Teoso sǵkire ia aãtsopa sǵpiretakiti, apakapari erekari Teoso sikakiti —itxa Xesosi.

<sup>8</sup> Nota Xoã sǵpiretai hĩte nitiākiti. Nikenakotakiti apaka nisǵpiretai hĩte. Ikinika nikenakotaka atoko, ikinika natamataka atoko, uusaaki nipamaka iua Teoso nitiri apisatoõ, kotxi iua oerekari ikinipoko notamoni. Nipamaka iua apisatoõ Teoso apisatoõ nipamakini atokokana. <sup>9</sup> Txamari iua Teoso nitiri txari notamoni:

—Kona pipamakape nota apisatoõ. Nota Teoso nitiri pite atokokana nitxa. Pitariakori Teoso sǵkire sǵpiretakani Teoso nitiriakori itxauana. Ninoa atokokana nitxa nota. Ikini kǵkiti ia aãtsopa sǵpiretakiti auĩākani Teoso nitiriakori itxauana. Ninoa atokokana nitxa nota. Teoso apisatoõnoka pipamakiniā atāo —itxa Teoso nitiri sǵkire.

<sup>10</sup> Iuaĩkana itxano nota:

—Ia aãtsopa sǵpiretari Teoso kamakiti apokini apisapanika. Na pikipatapiri ia aãtsopa sǵpiretakiti, kotxi paĩtiki Teoso sǵkire iaõka apokapitikako. <sup>11</sup> Maerekati

pikamapanika pinakasaaki, ininiã apikomoni maerekati pikama. Maerekati piïto nireëkiti pikamapanika pinakasaaki, ininiã apikomoni pikama. Atão inakari pikaminiã, apikomoni atão inakari pikama. Teoso nireëkitinoka pikaminiã, ininiã apikomoni Teoso nireëkitinoka pikama —itxa.

<sup>12</sup> —Hïkenakota —itxa Xesosi. —Patimapaniriko napokini ereë. Niminariko ikinimane parïka ïki ninoa apakapini ïkapani. <sup>13</sup> Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Ikinipoko auini apisapanika nota aua. Ikinipoko xipokaãka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

<sup>14</sup> Teoso sikari erekari iua nireëkiti kamakanimoni. Ninoa kãkiti auiritaãkako Teoso amãtiirite itximnina auapika ininina tïkane. Auiritaãkanako ïroinina Teoso sitatxineë. <sup>15</sup> Kãkiti maerekati iïtona nireëkiti kamakani !auiritaãka ïroinina iua sitatxitiã. Mïïti, ïtanoro minakatokatika sirïkakani, kokanirini pakini !auiritaãka ïroinina iua sitatxitiã. Apaka kãkiti ikamakitika teosonetakani ! auiritaãka ïroinina iua sitatxitiã. Aãpirena potxitakani, atão minasãkiretakani pakini !auiritaãka ïroinina iua sitatxitiã.

<sup>16</sup> —Nota, Xesosi txaua. Nota paniãtari ninitiri nitixine auakari sãpiretiniri ia nisãkire pitemoni, ininiã ikara pite sãpiretanako Teoso misãkiretikoãtaã apotiitakaniua. Tavii apika mekanirirano nota. Iõriki mitaro pokamara ia-tokopeka inakasaaki ïkaro atoko nitxa nota —itxa Xesosi.

<sup>17</sup> Erekarî Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Hïte ia nisãkire kenakotakanii, hïtxariko:

—Uai pina.

Hĩte posonatakani, uai hina. Hinirekiniãri, ia ãparaã hiãtako, kotxi ia ãparaã kãkiti auapininiika inĩkitaãkari. Ia ãparaã Teoso sikakiti kãkitimoni. Na pĩikitxitari.

<sup>18</sup> Nota, Xoão, õtãkikari kãkiti ia Teoso sãkire iõkatsopatakori kenakotakani. Ia Teoso sãpiretakiti apokini apisapanika, isãpiretaua. Ia aãtsopa sãpiretari kãkiti misiritiko. Ninoa misiritiko atokotxikana Teoso misiritai hĩte, hĩkoretiniãri hĩteka sãkire Teoso sãkirekata. <sup>19</sup> Kãkiti kipatiniãri ipixini ia Teoso sãpiretakiti iõkatsopatakori, Teoso !auritari iua tximiniri iua amãtiiri kãkiti auapininiika inĩkitaãkari. !Auritari iua ãroini isitatxineẽ. Ia aãtsopa sãpiretapekari iua amãtiiri, iua sitatxiti pakini.

<sup>20</sup> Xesosi txari:

—Ia niokanapirena atão. Iposopeka napokini tĩkane.

Atxari iuamõni:

—Ameẽ. Ari, uai pina Xesosi, Apiananiri.

<sup>21</sup> Xesosi Apiananiri sikari ikinipoko erekari ikinimane Teoso nakitiakorimoni. Ameẽ.

## **Teoso sãkire ameneri New Testament in Apurinã (BR:apu:Apurinã)**

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

### **Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Apurinã

**© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

